

長樂縣志卷之八

祠祀 秩祀 里祀 寺觀 塔附 墳墓

古者境內山川為之長者得主其祭推而崇德報功載在祀典者亦敬恭將事所有典章儀注謹依 部頒載入若夫鄉社里祠久託枌榆之蔭梵宮道觀特鍾山水之奇靈爽所憑休嘉斯應悉聽歲時祈報申其悃忱固順民理俗之一端也其先賢名臣墳墓附載於末以抒仁孝之懷作祠祀志

秩祀

社稷壇 在縣治西按察分司後 宋時建歷代遞修乾隆十二年知縣張

學舉重修按梅花澳亦有社稷壇在尖峯山後不知建自何時

長樂縣志 卷之八

祠祀

秩祀

會典每歲春秋仲月上戊日為民祈報皆正官將事教官糾儀生員充禮生掾吏執事 社稷位前各帛一黑 劔一 簋二 簋二 籩四 豆四 爵三 尊一 羊一 豕一

祭日雞初鳴承祭官以下咸朝服齊集黎明贊引禮生二人引承祭官詣盥洗所盥洗通贊禮生贊執事者各司其事以下自迎神至望瘞皆唱贊

贊引禮生贊就位引承祭官至階前拜位立引班禮生二人分引陪祭官文東武西班與朝賀同 各就拜位序立乃迎神贊引贊升壇

引承祭官升壇詣香案前司香跪奉香贊引贊上香承祭官三上香贊復位引承祭官降復位贊跪叩興承祭官行三跪九叩禮陪祭各官皆隨行禮奠帛初獻爵司帛奉篚進跪奠篚司爵奉爵進

獻爵奠正中皆退司祝禮生至祝案前跪承祭官暨陪祭各官皆跪司祝讀祝畢詣神位前跪安於案叩如初退承祭官暨陪祭官行三叩禮亞獻爵奠於左終獻爵奠於右儀均如初獻乃徹饌送神承祭官行三跪九叩禮陪祭官皆隨行禮司祝奉祝司帛奉帛恭送瘞所承祭官轉立拜位西旁東面俟祝帛過復位引至望瘞位望瘞贊告禮成引退衆皆退

祭文 唯神奠安九土粒食萬邦分五色以表封圻育三農而蕃稼穡忝承守土肅展明禋時屆仲春敬修祀典庶丸丸松柏鞏磐石於無疆翼翼黍苗佐神倉於不匱尚饗

風雲雷雨山川城隍壇 在縣治西南一里三峯塔下元時建歷代

長樂縣志

卷之八

祠祀

二

秩祀

遞修乾隆十二年知縣張學舉重修

舊志又有風雲雷雨壇在十都

會典每歲春秋仲月諏日致祭設案一於壇正中南向中設風雲雷雨之位左設本境山川之位右設本境城隍之位陳劔二簋二簋二籩四豆四案前設俎一羊一豕一又前設案一供祝版陳香盤一爐一鐙二西設案一陳帛七尊一爵二十有一陳福酒福胙於尊俎之次餘儀與祭社稷同

祭文 唯神贊襄天澤福祐蒼黎佐靈化以流形生成永賴乘氣機而鼓盪溫肅攸宜磅礴高深長保安貞之吉憑依鞏固實資捍禦之功幸民俗之殷盈仰神明之庇護恭修歲祀正值良辰敬潔豆籩祇陳牲幣尚饗

先農壇 在縣治東關外

後座五柱四扇三間前座三柱四扇三間外有更衣亭半月池晒穀埕

雍正

五年建乾隆十三年知縣張學舉請帑重修

六年捐置籍田六號坐落東關外共四畝

九分四釐一毫五絲三忽年載早晚租一十五石正內早穀五石報 憲五石完納糧倉晚穀五石買備品物

會典歲以仲春吉亥行耕藉禮各於治所東郊建先農壇前期二

日各致齋於公所掃除壇壇內外祭日雞初鳴設神案於壇正中

南向陳鉶一簋簋各二籩豆各四案前設俎陳羊一豕一又前設

香案一陳祝文香盤爐鐙左設一案東向陳帛一尊一爵三陳福

酒福胙於尊爵之次設洗盥於階下之東餘儀與祭社稷壇同

禮成更采服率屬行耕藉禮正官秉耒耆老一人牽牛農夫二人

扶犁雜職官奉青箱播種每歲收穫以供祭祀之案盛

長樂縣志

卷之八

祠祀

三

秩祀

祭畢更換蟒服行耕藉禮

農具赤色牛黑色種箱青色知縣扶犁典史播種耆老一人牽牛九推九返農

夫終畝 耕畢率僚屬耆老農夫望

闕行三跪九叩首禮

祭文 唯神肇興稼穡粒我蒸民頌思文之德克配彼天念率育

之功陳常時夏茲當東作咸服先疇洪惟九五之尊歲舉三推之

典恭膺守土敢忘勞民謹奉彝章聿修祀事惟願五風十雨嘉祥

恒沐於神庥庶幾九穗雙歧上瑞頻書於大有尚饗

壇制

高二尺一寸廣二丈五尺

牌壇

高二尺四寸廣六寸

座

高五寸廣九寸五分

祠制 府州縣建屋一間正房供 先農神位又於壇右建屋一

間為藉倉

儀注

祭日各官衣朝衣禮生引承祭官至拜位通贊唱執事者各司其事陪祭官各就位承祭官就位通贊唱瘞毛血禮生引詣盥洗所贊盥洗淨巾引詣香案前贊迎神行二跪六叩頭禮興行初獻禮引詣

神位前跪奠帛獻爵叩頭興詣讀祝位跪眾官皆跪宣祝文畢叩頭興引唱復位通贊唱行亞獻禮引詣

神位前跪獻爵叩頭興復位通贊唱行三獻禮如亞獻儀通贊唱飲福受胙引唱詣飲福受胙位跪飲福受胙叩頭興謝胙一跪三叩頭興復位通贊唱徹饌送

長樂縣志

卷之八

祠祀

四

秩祀

神行二跪六叩頭禮興通贊唱司祝者捧祝司帛者捧帛各詣燎所引唱詣望燎位焚畢揖復位通贊唱禮畢各官更蟒衣詣藉田行耕藉禮

耕藉儀

一官捧青箱一官播種各官俱用右手扶犁左手執鞭各行九推禮農夫終畝耕畢各回官廳更朝衣望

闕恭行三跪九叩頭禮仍將遵行耕藉日期具報知縣官秉耒城守營千總執青箱督捕廳播種知縣公出卽委屬官秉耒選擇耆老執青箱播種

耕藉器物

農具一赤
色 牛一黑
色 籽種箱一青
色

雩祀 通禮歲孟夏後諏吉雩祭陳設儀注同前

祈祀 祈雨在 城隍廟注水盈缸內插柳枝設香案香蠟拜用席

僧道各一班開壇誦經禮生二每早晚各官衣素服拈香步行至

廟禮生引至拜位通贊唱行二跪六叩首禮宣疏文畢再行二跪

六叩首禮焚疏文再揖禮畢雨降報祀祈晴則在廟中設香案香

蠟拜用紅檀僧道各一班開壇誦經儀同祈雨

報祀 通禮既應而報陳設祭品公服行報祀禮儀同祈祀

祭芒神 每歲有司豫期塑造春牛並芒神立春前一日各官吉服

迎於東郊祭勾芒神至本日衣朝衣祭神訖各執綵仗正官擊鼓

長樂縣志 卷之八

祠祀

五

秩祀

三聲環鞭土牛者三

祭軍牙六燾 每歲霜降日武營盛裝鎧仗迎請旗燾到教場張幕

結綵以帛一白 羊一豕一行三獻禮禮畢放炮揚威撒幕束裝整

伍回營歸燾於廟

邑厲壇 舊在縣治北坑尾山明初知縣邱宗亮遷西北斑鳩嶺宏

治六年知縣潘府改遷天王寺側崇禎十二年燬知縣夏允彝重

建 鄉厲壇諸都圖各一所規制同惟十都五所

會典每歲清明節七月望十月朔日祭厲壇於城北郊前期守土

官具香燭公服詣城隍廟以祭厲告本境城隍之神上香跪三叩

興退至日所司陳羊三豕三米飯三石尊酒楮帛於祭所設燎鑪

於壇南黎明禮生二人引守土官公服詣神位前贊跪守土官跪贊上香守土官三上香贊叩興守土官三叩興退執事者焚楮帛守土官詣燎壚前祭酒三爵退禮生仍奉城隍神位還廟各退

謹案

壇祭邑之無祀者蓋倣古者泰厲公之祭也洪武三年頒制在邑者其制廣丈五尺高二尺階三級餘無階繚以垣

祭厲壇文 普天之下后土之上無不有人無不有鬼神人鬼之道幽明雖殊其理則一故制有治人之法卽制有事鬼之道念厥冥冥之中無祀鬼神昔爲生民未知何故而歿其閒有遭兵刃而損傷者有死於水火盜賊者有被人取財而遇害者有被人強奪妻妾而死者有遭刑禍而負屈死者有天災流行而疫死者有爲猛虎毒蟲所害者有爲饑餓凍死者有因戰鬪而殞身者有因危

長樂縣志

卷之八

祠祀

六

秩祀

急而自縊者有因牆屋傾頽而壓死者有死後無子孫者此等孤魂死無所依最堪憐憫或依草附木或作妖爲怪徘徊於星月之下悲號於風雨之中今迎 尊神以主此祭謹設壇於北郊茲當

月中

上

元佳節謹備牲醴羹飯專祭本邑闔境無祀鬼神等衆靈

其不爽來享此祭凡或一縣人民倘有不孝不睦侮法欺善種種奸邪不良之徒神必報於 城隍發露其事使遭官府輕則笞決杖斷重則徒流絞斬若事未發必遭陰譴使舉家必遭災害如有克孝克睦守法爲善正直之人神必達於 城隍陰加護佑使其家道安和農事順遂父母妻子保守鄉里我等官如有上欺 朝廷下枉良善貪財作弊蠹政害民者 靈必無私一體昭報如此

則鬼神有鑒察之明官府非諂諛之祭尚饗

關帝廟 在縣治西南

其先卽射圃

康熙四十一年知縣張植等修建雍

正五年改觀德堂爲

崇聖祠乾隆二十四年知縣賀世駿改創

三間同治七年里人鄭鵬程陳良驥陳臻等勸捐重修正殿更設

宮門兩楹制倣

文廟

互詳射圃中

謹按明洪武都金陵城中建十

四廟一曰漢前將軍壽亭侯廟自是香火遍天下嘉靖十年太常

卿黃芳奏改稱漢前將軍漢壽亭侯天啓四年祭始稱帝 國朝

順治九年 敕封忠義神武關聖大帝雍正五年 敕封神曾祖

光昭公祖裕昌公父成忠公增設神牌於後殿乾隆間 加封靈

佑嘉慶十九年 加封仁勇道光八年 加封威顯咸豐四年

長樂縣志

卷之八

祠祀

七

秩祀

加封護國保民咸豐七年八月奉 旨 關聖大帝神牌改寫

關聖帝君 每歲春秋仲月諏吉及五月十三日均致祭前殿以

地方正印官主祭後殿以丞史將事執事以禮生祭日陳設牲牢

器數及迎神上香奠獻讀祝送神視燎儀注均與京師同

儀注

祭日贊引官引承祭官進左旁門至盥洗所贊盥洗盥洗畢引至

殿內行禮處立典儀唱執事者各司其事贊引官贊就位引承祭

官就位立典儀唱迎神樂奏格平之章樂作司香官捧香盒就香

爐左邊立贊引官引承祭官就香爐前立司香官跪贊引官贊上

香承祭官立將炷香接舉插爐內又上塊香二次畢贊引官贊復

位承祭官復位立贊引官贊跪叩興承祭官行三跪九叩頭禮樂止典儀唱奠帛爵行初獻禮樂奏翊平之章捧帛爵官將帛爵捧進

神位前奠帛官跪獻畢行三叩頭禮退執爵官立獻畢退讀祝官詣安祝文棹前行一跪三叩頭禮捧起祝文立樂止贊引官贊跪承祭官讀祝官俱跪贊讀祝讀畢捧至

神位前跪安盛帛盒內舉行三叩頭禮退樂作贊引官贊叩興承祭官行三叩頭禮立典儀唱行亞獻禮樂奏柷平之章樂作執爵官照初獻禮獻畢退樂止典儀唱行三獻禮樂奏靖平之章樂作執爵官自案右邊照亞獻禮獻畢退樂止典儀唱徹饌樂奏彝平之

長樂縣志

卷之八

祠祀

八

秩祀

章樂作徹畢樂止唱送神樂奏康平之章樂作贊引官贊跪叩興承祭官行三跪九叩頭禮立樂止典儀唱捧祝帛饌各詣燎位捧祝帛香饌官各至

神位前俱跪捧祝帛官行三叩頭禮捧香饌官不叩頭將祝帛香饌依序捧送承祭官退至西旁立候捧祝帛各官過畢復位立贊引官贊詣望燎位樂奏與送神同樂作承祭官至燎爐前焚訖樂止揖贊引官贊禮畢退

同日祭後殿行二跪六叩禮

春秋前殿祭品牛一 羊一 豕一 豎一 鉶二 簠簋各二

籩豆各十

鑪一

鐙二

帛一

色白

香盤一

尊一

爵二

牲陳於俎帛實於筐尊實酒冪勺具

五月十三日祭品陳牛一 羊一 豕一

果實五盤

用核桃荔枝龍眼棗

栗不設籩豆後殿不用牛餘照前殿

春秋祭後殿祭品設三案每案羊一 豕一 鉶二 簠簋各二

籩豆各八 鑪一 鐙二 帛三色 香盤三 爵三 尊三

俎筐冪勺具

春秋祝文

維

神星日英靈乾坤正氣允文允武紹聖學於千秋至大至剛顯神威

於六合仰聲靈之赫濯崇典禮於馨香茲當仲春秋用昭時饗惟祈

長樂縣志

卷之八

祠祀

九

秩祀

昭格克鑒精虔

聖誕祝文

維

神九宇承庥兩儀合撰崧生嶽降溯誕 聖之昌期日午天中屆恢

台之合序聰明正直壹者也千秋徵肝蠻之隆盛德大業至矣哉

六幕肅馨香之薦爰循懋典式展明禋苾芬時陳精誠 鑒格尚

饗

春秋祭後殿祝文

唯公世澤貽庥靈源積慶德能昌後篤生神武之英善則歸親宜

享尊崇之報列上公之封爵 錫命復隆合三世以肇禋典章明

備恭逢諏吉祇事薦馨尚饗

五月十三日祭後殿祝文

禮隆報祀誼重推恩當崧生嶽降之期溯木本水源之始輝煌棟
宇憑依已妥於上公修潔豆籩將饗告虔於仲夏惟 神昭鑒尚
其格歆

樂章

迎神格平

懿鑠兮焜煌 神威靈兮赫八方偉烈昭兮累禩祀事明兮永光
達精誠兮黍稷馨香儼如在兮洋洋

奠帛初獻翊平

長樂縣志

卷之八

祠祀

十

秩祀

英風颯兮 神格思紛羽蓋兮龍旂欒桂醕兮盈卮香始升兮明
粲惟降鑒兮在茲流景祚兮翊昌時

亞獻椒平

觴再酌兮告虔舞干戚兮合宮懸歆苾芬兮潔蠲扇巍顯翼兮
神功宣

終獻靖平

鬱鬱兮三申羅籩簋兮畢陳儀卒度兮肅明禋 神降福兮宜民
宜人

徹饌彝平

物惟備兮咸有明德惟馨兮 神其受告徹兮禮終罔咎佑我家

邦兮孔厚

送神康平

幢葆葳蕤兮 神聿歸馭鳳軫兮 驂虬駢降烟煜兮 餘馥馥願回

靈盼兮德洽明威

望燎康平

焄蒿烈兮燎有輝 神光遙燭兮祥雲霏祭受福兮茂典無違庶

揚駿烈兮永奠疆畿

文昌祠 在縣治南門內

嘉慶二十一年知縣楊清翰建成豐九年邑人林道照陳有濫陳良驥等倡脩

後兩進前祀文昌

咸豐七年奉旨文昌帝君神牌後祀三代嘉

六年太常寺奏准文昌帝君三代姓名查無確據未便請加封號擬增置神牌一分牌面書文昌帝君先代神位字樣謹按

長樂縣志

卷之八

祠祀

七

秩祀

文昌之祀其說有二一以為天神天官書斗魁載匡六星一上

將二次將三貴相四司命五司中六司祿是為文昌宮文昌之稱

始於此一以為人鬼在周為張仲在漢為張良在晉為涼王呂光

在五代為蜀王孟昶在姚秦之世又為越雋人張惡子立廟梓潼

山唐皇西狩追封左丞僖宗入蜀封順濟王宋咸平中收封英顯

元延祐初加封輔元開化文昌司祿帝君帝君之稱始此 國朝

嘉慶六年五月奉 上諭 文昌帝君主持文運福國佑民崇正

教闢邪說靈蹟最著海內崇奉與 關聖大帝同宜列入祀典用

光文治着交禮部太常寺將每歲春秋致祭之典及一切儀文仿

照 關帝廟定制詳查妥議具奏遵 旨奏准一切儀注祭品均

與 關帝同咸豐六年十一月奉 上諭升入中祀謹按通禮歲以二月三日
暨仲秋諷吉致祭咸豐六年升中祀後奉文每歲仲春另
諷日致祭仍祭二月初三誕日祭品儀注均與 關帝同
章樂 迎神不平

秉氣兮靈躍翊文運兮赫中天
蜺旌兮戾止雕俎兮告虔迓 神
麻兮於萬斯年

奠帛初獻俶平

神之來兮籩簋式陳 神之格兮几筵式親
極昭彰兮靈貺致蠲 潔兮明禋升香兮伊始居歆兮佑我人民

亞獻煥平

再酌兮瑤觴燦爛兮庭燎之光申虔禱兮
神座儼陟降兮 帝

長樂縣志

卷之八

祠祀

十三

秩祀

旁粢醴潔兮齊漱公將綏景運兮靈長

終獻煜平

禮成三獻兮樂奏三終覃敷元化兮絜
神功馨香達兮盱嚮通

歆明德兮昭察寅衷

徹饌懿平

備物兮惟時告徹兮終禮儀 神悅懌兮鑒在茲垂鴻佑兮累洽

重熙

送神蔚平

雲輶駕兮風旗招 神之歸兮天路遙瞻翠葆兮企丹霄願迴靈
眷兮福我朝

望燎蔚平

烟燼降兮元氣和 神光燭兮梓潼之阿化成者定兮橐弓戢戈
文治光兮受福則那

祭文 惟神績著西垣樞環北極六匡麗曜協昌運之光華累代
垂靈為人文之主宰扶正久彰夫感召薦馨宜致其尊崇茲逢聖
誕用昭時祀神其格歆鑒此精虔尚饗

祭 先代文祭引先河之義祀崇反本之思矧夫世德彌光延賞
斯及祥鍾累代烟列宿之精靈化被千秋緯人文之主宰是尊後
殿用答前麻茲屈仲春秋敬薦微忱靈其格歆鑒此虔誠尚饗

附載城鄉 文昌祠 一在東門外嶺口梅峯寺旁邑祠 文昌

長樂縣志

卷之八

祠祀

三

秩祀

始此明蔣行義有碑記 一在鼇頭現地 一在闌兜咸豐五年建

一在二都龍門乾隆三十九年建 一在緜上 一在三都岱邊松溪寺

一在四都名翬文閣康熙二十七年建 一在六都詳見雲谷寺 一在八

都石門獬豸山麓道光五年建里人陳心炳記別見祠傍有洞名醒泉巖水聲泠泠冬夏不涸洞口有池心炳鐫

鳳池浴月四字題詠甚多祠後層巖疊石高頂處鐫聚星巖三字
韜園所書又有文明氣象四字為洗馬陳玉銘書有洞可通至半
山暑月涼蔭可以消暑又有浣筆泉滌硯
池其水從巖穴湧出皆天成之勝境也 一在九都靈隱寺

一在灣裡 一在十都湖尾道光六年李國禎等重修 一在十

一都巽頭 一在十二都田墩咸豐元年鄭姓建 一在董厝濠井書室

同治三年 董姓建 一在十三都玉溪旁乾隆十八年重建 一在十四都旒峯

一在旒峯頂陳姓建 一在雲路乾隆八年生員陳觀光等建 一在龍角峯

旁乾隆二十五年建

一在十六都詳見華文寺

一在十七都詳見萬壽寺

在二十一都三星橋 一在方安里潭頭 一在文庄 一在大

宏里明崇禎開里人施鏡光建 一在大宏里嶺南雍正八年建乾隆十九年修 一在厚

福同治二年建 一在文石上元塔邊乾隆十三年建 一在二十四都鼇峯

之麓

五賢祠 在縣東城外半里許舊名朱文公祠明正德七年知縣楊

樑以公常與黃勉齋劉存菴劉在軒陳自修四人講學請於巡按

御史李如奎改城隍廟於縣治北將廟地為祠祀公而配以四先

生東有亭曰源頭活水西有亭曰天光雲影門扁曰溪山第一皆

摹刻公墨蹟邑人鄭錫文記國朝祀典之正載諸令甲加察於憲綱鄉賢一祠則又附於文廟蓋所以旌淑德美教

長樂縣志

卷之八

祠祀

古

秩祀

化以昭示乎邑人然非識治體者鮮有得其正也正德王申慶遠楊侯合長樂之三年事理民輯乃按圖考志曰夫禮有其舉之固莫敢廢重複而瀆其可不正乎城隍一也近邑半里許先既有祠矣重建於龍津坊者不當革乎夫晦菴朱子宋大儒也毓秀於閩閩中稱為海濱鄒魯者實助於是淳熙間嘗偕高第黃勉齋避居於吾邑勉齋實邑產而邑人陳自修劉存菴與其弟在軒咸從之遊則吾邑又為過化之鄉鄉賢祠得祀朱子者亦由是夫既從祀於文廟又混祀於鄉賢瀆也請於提學姚公巡按御史李公咸避其言乃即龍津廢祠撤而新之前廟後寢敞以儀門中祀朱子四先生配焉又左瀦清泉右鑿方池取朱子源頭活水天光雲影語為左右廂房扁以寓高山景行之思新儀聿崇而舊舉不廢匪直遵合甲稱官守而已也竊惟吾邑數百年來斯文代不乏人朱子之書家傳人誦固有暗合默踐於家庭政事閒所謂日用而不知者今侯肇祠而專祀之其期待我邑人也遠而且大繼此當有卓然得朱子心法於言語文字之外者矣侯持己嚴明而施政公恕文事武備所可言者尚多特詳於是者正祀典崇正學也聞侯前署黃陂學政嘗捐俸百金以新廟學又新程子祠先提學沈公仲律陳公文明咸為記其事蓋侯崇正之心無日不有故其政隨地而著有不待於余之言也後有名宦繼侯之志而稽其績於余言焉庶幾乎斯祠之不替也時正德七年記陳大濩詩吳航城外

晦翁祠虎踞龍蟠景最奇千嶂爛光青掩映九溪雲影碧漣漪道
從孔孟傳心法學為周程振羽儀此日登堂拜遺像泰山喬嶽快
瞻嘉靖丁未知縣吳遵重脩祠扁曰高山仰止門扁曰朱文公祠
依

俱邑人鄭世威書

明教諭李應科記別見鄭世威詩南來獨抱伯
牙琴清夜誰能嘆賞音流水盈科看後進高山

仰止見初心千年正學宗鄒魯一脈真傳貫古今迤邐道通光霽
滿從容步徹白雲深其二晨興展謁晦翁祠過化端為百世師誠
意正心指諸掌泰山喬嶽今在茲文光耿耿天河表風韻悠悠江
漢涓涓九溪人不見詠歸應喜夕陽遲 萬曆二十

六年知縣盧龍雲重建

明陳省記萬曆戊戌八月朱文公先生祠
重建告成祠久傾圯始議建於南海海虛

彭令君繼而舉事於江陰暨湖郁令君咸捐俸為倡不佞省暨諸
士大夫具資斧助經理增舊制苟合矣乃今南海起溟盧令君來
嘉與盛典圖終厥美徵原議舊負學租及草洲子粒給諸費然後
煥然改觀謂宜有記示將來屬執簡於不佞省不敢辭記曰天生
蒸民秉彝好德天下郡邑祠朱先生者明興夥矣匪直經術傳註
廣厲學宮之路又非徒為制作美觀鋪張文具而已先生在寶慶
淳熙間避地於閩考亭毓秀之鄉武夷講學之所無論已其遊吾
樂則黃勉齋陳自修與劉存菴劉在軒兄弟先後從遊皆產吾樂

長樂縣志

卷之八

祠祀

五

秩祀

以故祀朱先生以四賢為之配祠創於正德丙申慶遠楊令君具
在鄭方伯記中夫創之不易重建之尤難吾邑何幸而遭諸令君
崇德表俗加意脩建以惠我邑民也夫不佞與吾邑父老子弟知
祠先生矣亦知祠先生所以勃然悟悚然思乎何以思也先生序
大學傳謂自王宮國都以及閭巷莫不有學無地非學也曰自天
子之元子眾子以至公卿大夫庶人之子弟無一人非學也其大
要機惟在正心誠意無時非學也敘典秩禮降自上帝根諸民彝
身心意知之間正者自正孰為偏倚誠者自誠孰為欺蔽斯須不
嚴豈惟言動視聽咸為錯謬甚者悖淫匪彝亂常賊倫雜逞乎其
間所係匪淺如之何勿思茲祠成矣凡我邑父老子弟大夫士入
其門升其階躋其堂朱先生坐焉四君子待焉今之日猶昔日也
思其若何而講習若何而切磋若何而答問酬應若何而存養擴
充慎思可也近思可也不佞嘗遊晦翁巖遊三溪見先生遺墨在
焉每徘徊而不能去不知當時邑之父老子弟親炙先生之言貌
其所感發興起當何如也思之思之若或見之焉飛魚躍之趣天
光雲影之懷師弟相依不以夷險加損豈非其誠正之學有得於
大本要機者真足以繼往而開來教世而範俗先生之所以特祀
分祀遍於四海之郡邑及所過化之鄉者以此也先生享天下四
方之祀亦望天下之無地非學無人非學無時非學善其視聽言
動敦其敘典秩禮以無蹈於匪彝悖淫之患此吾儕父老子弟之

所宜勃然悟悚然思者在此也誠思之矣祠之興也有裨哉存誠守正動以天行雖日與父老子弟暇遊於此宴息於此亦不失為活水天光鳶飛魚躍之景忽而不思則心無天遊六鑿內攘雖終日絃歌於此講誦於此亦不過為虛飾美觀之具即使廣厲學宮以經術傳註獵榮鈞譽朱先生不樂也不佞末學乖駁不足以窺先生之門墻於其祠之成也既以荷諸令君之嘉惠吾邑獨憮憮然舉先生之所以祠者欲使吾邑之父老子弟知所以創祠修祠之意果有在於勃然悟悚然思者也祠正堂僅存數柱撤而重新之增建層閣改奉先生神座於堂之上方深丈餘祀文昌君於閣上諸令君有功於祠者置主列於左右以俸民思亦邑父老子弟之意也詩遠宗周孔近師程通會諸儒集大成修己治人留疏草正心誠意誓生平一從趙相讒人忌遂有斯文僞學名卦得遜交因遠跡海濱過化列羣英其二當年師弟迥追隨故見荒祠敞海湄遺像儼從陳蔡日高堂似坐孔顏時曾捐資斧鋤茅塞無復遊人咏黍離廟貌重新供崇禎六年祠圯知縣鄭尚友新之為易今仰止羹墻千古有餘思

名並置祠田一畝七分八釐以贍守祠者

明邑人馬思理記吾邑俗從古淳茂士民守恒

業莊誦師說外無他奇巧以支離其本質故其資性頗為近道用之敦本持正視他邑亦較易自朱文公過化而後縉紳先生益以

長樂縣志

卷之八

祠祀

六

秩祀

理道相觀摩數百年來理學名宿相踵於世近氣運稍歇俗不能無少變然元氣終固值賢父母稍一倡導之即故俗依然尚不至洗髓易腸煩政瑟之更張則其風教所從來者久遠也麗邑東郊有祠祀文公而配以直卿輩四先生四先生皆邑產即文公過化時所從游稱入室者祠顏五賢附文公而榮邑產也近有專稱朱子祠者於郡乘不合而祠之前楹又顏曰崇正噫似也抑孰知今之所豔為崇正而俎豆爭先者固昔日所指為邪氣為僞學為逆黨而欲投之四裔者耶繇此思之艱難險阻之中何啻蒼黃萬變滄澗渾互淆文公於此獨能不失其正又得四先生揭千古之眼審百家之同異定所皈依卒也羽翼正統章程百代則四先生之獲分文公末座而稱五賢豈待今日論定哉是祠創自正德王申歷今兩甲子中間經幾修修久仍復就圯武林鄭侯怒焉捐俸鏹一重新之其工視前加甚而意良厚夫侯固所稱賢而能倡導士民復還舊俗者也余嘗從武林來武林人道侯孝友津津不少置兼之學有淵源氣節干雲使升紫陽之堂與四先生接席其針芥投而氣誼洽又不知何如茲役也甯第以數椽丹堊了仰止之案哉吾聞古之良有司三載報政以往一切崇尚澹大與吏民相安無事訊訟稀少琴韻和平而禮教以興茲祠之修適當侯報政之期白鹿滄洲其則不遠侯之心眸當幾迴旋焉夫流時耕鑿今之長樂未變於古也何獨性命閒事為不然鳴琴之暇繼以講學俾復本

質而還之故俗誰曰淳熙慶元閒人物不在今日甄陶中凡我多
士尊朱日久其於四先生之微言懿行又所稱童習而里談之者
亦曾有明睿端莊造詣純篤獨得師傳者乎則請以質之直卿先
生有蚤歲聞道力行不倦無忝祖訓者乎則請以質之自修先生
有夙秉異姿承家學之源流篤志敏道力闢佛老軼眉山而媲美
河南者乎則請質之履之用之二先生之四先生者其進修各別
要以立志端方用功堅苦卓然不為異說所惑生死所動而克底
成德一也今世學士骨力脆薄遇小小利害便自魂搖魄懼站立
不住此以自慎其五官尚不足何暇定干聖之統系乎吾黨勉之
流風未遠師範尚存但堅向往決不落窠臼有賢侯振鐸其上
掃聖路妖氛偕之蕩平此亦千秋一快事也侯名尚友號月菴浙
江錢塘人辛未進士在歲重葺文廟鄉賢名宦及春秋祭器皆
下勝書是祠修於余歸田之後故載筆而為之記雲間夏完淳詩
題時九歲安昌千嶂合巒亘復嵯峨高峯隱雲際日炤瀾生波駕
言往東隅祠宇倚山阿青池映綠草峭閣響鳴珂肅肅瞻遺像徘徊
徊起嘯歌巍茲五君子講學潛幽坡依師被讒逐亮節不改初苾
芬永懷報濟濟士民和山
川自今古大道長不磨
多宗朱子尚矣亦知吾邑五賢祠之建其意義深遠有所自來乎
文公集宋儒大成繼往聖開來學其為三代以下之孔子也豈願

長樂縣志

卷之八

祠祀

七

秩祀

問哉乃當時執政錮以偽學公知幾遠潛身入閩流寓至吾邑
所過名山川皆手勒墨蹟且藏書石室以待其人時則有若黃陳
二劉四先生得從之遊至今文公巖有講學故址嗚呼以當日所
指為偽學而斥之而禁之之文公而一見深服早知為繼往開來
實三代以下之孔子其高風特識有拔出時流萬丈者故今特祀
文公以四賢配微特崇德薦馨居歆俎豆亦見豪傑有志識宗正
學便為聖人之徒相依干祀壇坫不祧所以鼓勵後學至深且遠
矣顧其祠宇在縣治東郊荒涼已久舊歲始議修葺樹垣墉易梓
材之朽蠹者飭磚瓦之聖漫不鮮者乃復構其前堂巍然巨棟頓
改前觀踴躍爭趨五閱月而工竣適逢國朝特詔尊朱躋班十
哲始知此心此理四海同揆吾邑獨不令而從有得風氣之先為
足尚也至於正學真傳文公為天下之瞻仰者雖非吾一隅所得
而私第迴想當時避禁之日與吾邑四先生遊至今五百年來風
流如昨即謂公之神靈長依依於此地之名山勝水閒也夫誰曰
不嗣復地祠田地租俱歸學徵乾隆二十七年知縣賀世駿領帑

重修年久倒塌咸豐閒廣文許遂元蔡承祐高之槐周維翰先後
倡捐重建邑人士感修祠之功立四公主祀焉
邑人陳澍雲記自來正學之傳不可

磨滅觀 五賢祠之興廢益恍然也祠顛末詳志乘自安成賀公重修後百餘年無起而議者咸豐辛亥二月祀都人士僉詞請帑寢不行識者憾之時司諭甌甯許公遂元毅然倡百金司訓龍溪蔡公承祐甫捐樂器殫餘力贊襄眾亦鼓勵拓而新之厥功偉焉夫以鞠草之場復為講陳俎豆人知禮矣秋丁 文廟樂成園橋觀聽人知樂矣禮樂興吾黨文明之大機會乎未幾二公卸篆工猶未竣也乃一壞於壬子颶風再壞於癸丑霖雨補救頻仍董其事者力綿費絀矣適晉江周公維翰詣祠展謁不憚圖終正齋海澄高公之槐嘉其意亦樂相與有成今祠巍然煥然半畝塘開天光雲影入門瞻仰竦然如見正學心傳一堂講授伊誰之賜僉曰非許蔡莫倡其始非高周莫善其成奉生主配賢侯宜矣雖然四公之心豈為是歟蓋望我郡人士登紫陽堂讀紫陽書紹紫陽學附四先生末席為邑產光也吾黨勉乎哉不佞承諸君請不敢以不文辭用以告後之觀感興起者

每歲春秋仲丁致祭各官綵服將事兩跪六叩行三獻禮儀同各廟祀

祭品帛一 劔一 羊一 豕一 酒尊一 白瓷爵三 簋三

長樂縣志 卷之八 祠祀 六 秩祀

簋二 籩豆各四

朱子祠 在縣西河南奎橋東康熙閒知縣衛良佐撤齊天王廟改

祀朱子並作義學乾隆二十六年知縣賀世駿移建於河陽監生

陳五浩助五十金並聖德境里民助三十金請留舊祠為本里書

院仍祀朱子 乾隆三十三年咸豐四年先後重修 一在六都雲谷寺旁 一在八

都蓮石寺旁 乾隆八年 一在天龍井之麓名紫陽閣文公三至其

地年友張一漁為築精舍講學其中後人立祠於朝元觀之旁康

熙三十八年移建今所 明知縣彭哲與捐田二十九畝零為春秋祀典 一在九都桃坑

山文公嘗遊於此故祀之 一在十一都巽頭 乾隆閒里人蔣巖高建 一

在十二都田墘 一在九龍菴後 乾隆五十年里人陳魁襟石元極等建又置租三千勛道光五

年里人陳學波重修

一在十四都洞湖五松下

康熙二十八年林姓建乾隆二十四年重修

一在二十四都碁山之麓

康熙五十二年董姓建

城隍廟

舊在縣後東北五十步東華觀之側宋元祐丁卯年創明

洪武十四年知縣邱宗亮改創於東隅城外半里許正統間知縣

龍韜修葺宏治間知縣王渙重修

教諭潘援記治民事神皆有職

顯光揚聲者世有其人於事神之禮昧者則不知為能知者又以非所當急而不暇為有知為當急者或憚於工役靳於財費而不敢為是以祀典祠廟坐此而圯壞者難以指屈計也脫能興廢於積弊大壞之餘舉事於人所難為之際非有超特之見卓越之才莫與於此長樂城隍廟舊在縣治後東華觀側創自宋元祐間至我朝洪武辛酉縣令邱宗亮遷置今所正統中縣令龍韜復因舊制而修葺之歷今數拾年職長民者率視如傳舍而弗之肯顧頽圯相仍幾至不屋宏治戊午王侯以進士為邑令長補弊扶傾眾廢畢舉爰謁斯廟目擊而心惻曰吾職茲土神將於我乎依使不圖改觀將鞠遺址為草莽矣厥責安逃遂自規畫計財鳩工首葺

長樂縣志

卷之八

祠祀

九

秩祀

中堂高敞雅潔視昔有加內深其宮為神攸棲前擴其庭啓民皈仰旁翼以廊便有事者進退外崇其門聳行道者觀瞻購堅易朽起撓為隆輪奐翬飛藻繪明煥始工於是歲十月落成於今之四月事辦而民不知勞費廣而財不告匱誠所謂見之超特才之卓越而能為人所難者矣邑之父老羣拜請曰昔無今有維我侯之績不有紀述曷勸方來願盡顛末以鑠諸石竊惟城隍立廟在古未有而創於唐蓋周禮安民救荒必索鬼神祭法亦謂能捍大患禦大災者則祀之城隍之神為民禦災捍患凡水旱疾癘在所必禱廟祀之制亦以義起之者歟況國典褒封優崇祀禮又當加之意而不可緩焉者也侯為此舉揆於義而稱稽於制而宜雖事神也實為民也古良牧之用心殆不是過使先侯為令者心侯之心則必不致傲繼侯為令者能事侯之事又何以廟之有廢為患哉不特此也他如修學校建譙樓修橋梁開官堰立鄉賢祠樹登瀛坊修山川社稷壇造預備倉制漏澤園凡有關於民神有補於世教者無一而不究心是廟之興特其興廢之一事而已侯名渙字時霖浙之象山人視篆三年政通化洽臺章旌薦登擢有期故並書廟石以慰士民他日去思之情且以告將來之識者

正德七年知縣楊樑以城外所建為五賢祠仍祀城隍於舊廟嘉靖四十年知縣戴時望重修三座中

座七楹三間旁有廡前後座各三楹三間隆慶六年知縣蔣以忠

砌廟道南抵下櫓橋又於西北造橋一座通北街有記今天下郡邑悉建城隍廟

制也夫城為城隍為池以各有神故列祀典儼然肖形象佩冕服守土之吏每朔望羣寮屬詣拜以為常長樂城隍廟舊在郭外六平山下嘉靖改元四泉楊司空先生尹茲邑移置今所即宋元祐間故址云茲去楊公五十載矣廟貌如新而廟前衢道長可百丈外臨深溪久弗治率傾圯罔置足余始至即病之思檄民興事已復念曰民未知信未可勞也居四年而政漸通人情漸和邑諸廢次第舉乃召其左右民告曰汝輩敬神乎盍修道乎願則官籍汝名不入汝金汝各自營以告成於我不者弗強也乃居民咸稽首受命如余旨負土甃石踴躍趨事廟右臂有澗兩崖壁立路弗接復命琢石跨為梁踰梁以西復築衢道逶迤至北門外凡三百丈皆坦途蕩如翼如可馳可輿夫然後廟有所拱衛而神之威益森嚴而不可忽不越月工告成云余觀樂民鮮厚藏而務嗇即尺帛不妄捐費獨於城隍最謹每歲元日後封羊椎豕沈玉瘞帛伐鼓撞鐘拔巫紛史崇事報享之儀靡所不備又危困必籲疾札必禱相率走廟下或自為與為其父母兄弟妻子者日無慮什百惟恐以不得致虔於神為歎今茲之役余固以順人情而驅之不可使

長樂縣志

卷之八

祠祀

三

秩祀

知而使之由焉者也雖然語有之極治之國神不為靈何者政能得民則興便布利除害祛患民不祈而獲所欲不禳而違所惡籲號請禱之誠無所用之而烏有所冀於神余愧無以得民不能禁民使不趨於神而況是道又余之所欲修而用以倡夫民者也乃記歲月以告嗣來者

萬曆乙卯年邑紳陳省倡修 國朝康熙乙亥年署知縣胡旭榮重修 王申年知縣衛建勳重修嗣知縣傅宸楹重修

乾隆十三年知縣張學舉重修 二十年知縣黃瑞鶴折後座

重建五楹三間未竟二十五年知縣賀世駿捐俸修竣道光庚子

年合邑鳩貲重修新建文武門鐘鼓樓陰陽司又於廟左建三座

前進行臺今為善歸局公所 中進資聖寺觀音堂今為育嬰局公所 三進僧舍行

臺之西又小二進頭進合邑尊王殿二進熊公祠三進官廳今為寅社

施藥及收買行臺之東為毓麟宮土地祠於同治八年勒碑經其字紙公所

始者邑紳鄭朝華陳有滢等繼其成者陳良驥鄭向奎林絢雲也
謹按易之上六曰城復於隍禮記天子大蜡八水庸居七水隍也
庸城也此城隍之所由名也其見於史者南齊書慕容儼傳有守
郢禱城隍獲祐事見於集者唐張說張九齡杜牧皆有祭城隍文
見於說部者李陽冰爲縉雲令以不雨告於城隍神曰五日不雨
將焚其廟竟得雨爲新其廟以酬之逮後唐清泰中封以王爵宋
建隆後其祀遂遍天下明初去廟爲壇加封府曰公州曰侯縣曰
伯旋去公侯伯封號定其主爲某府州縣城隍之神其後又改用
廟祀設座判事如長吏狀迄今因之朔望行香及祈禱皆詣廟行
禮每歲春秋仲月諏日與風雲雷雨山川同壇致祭不在廟內

長樂縣志

卷之八

祠祀

三

秩祀

天后宮 在西關外花眉臺原在西隅南山之陽乾隆二十六年知

縣賀世駿以水神面山非宜將宮改作書院互見吳航書院移祀天后神

於今所建宮二座前座三柱三間後座七柱三間額曰天后宮旁

爲僧舍咸豐間商民鳩資重修新蓋拜臺官廳迄同治甲子始落

成董其事者邑紳陳聲琚鄭向奎也謹按后姓林世居莆田之湄

州與都巡簡惟慤郡志作愿之六女母王氏生后於宋建隆元年少靈

異知人禍福長能布席度海乘雲遊島雍熙四年九月九日身化

是後常衣朱衣飛翮海上宋宣和中路允迪使高麗中流震風神

降於檣獲濟使還奏聞特賜順濟廟號紹興二十六年封靈惠夫

人自後救疫禦賊屢有奇烈紹熙三年晉封靈惠妃元至元十八

年晉封護國明著天妃歷加徽號明洪武中晉封昭孝純正孚濟
感應聖妃永樂七年晉封護國庇民妙靈昭應宏仁普濟天妃
國朝康熙十九年平定臺灣神湧潮濟師 敕封護國庇民妙靈
昭應宏仁普濟天妃二十三年 晉封天后五十九年 特予春
秋祀典雍正十二年奉 文各府州縣一體建廟奉祀乾隆二年
加 封福佑羣生三年奉 文通行春秋二祭三十二年加 封
誠感咸孚五十三年加 封顯神贊順嘉慶五年加 封垂慈篤祐
六年追 封 神父為積慶公母為積慶夫人每 遣官出使琉
球等國率祭告而行疊加封號每歲春秋仲月諏日致祭各官絲
服將事二跪六叩行三獻禮儀同各廟祀

長樂縣志

卷之八

祠祀

三

秩祀

祭品帛一 白瓷爵三 羊一 豕一 酒尊一 鉶一 簠簋
各二 籩豆各四

祭文唯 神菩薩現身至聖至誠主宰四瀆統御百靈海不揚波
浪靜風平舟航穩載悉仗仁慈奉 旨崇祀永享嘗蒸茲屬仲春

敬薦豆馨希 神垂庇海晏河清尚饗

附載各鄉 天后宮 一在陳坑渡頭 一在港尾 一在仙岐
澳 一在東山 一在文石 一在松下 一在后山 一在梅
花 一在漳港 一在壺井 一在澤里 一在梅花城內 一
在東平村

土地祠 在儀門東中祀土神朔望正官謁廟及城隍回祠行三拜

禮乾隆二十七年重建

倉王廟 舊卽元明廟在縣治儀門前之東元元統元年主簿劉伯

貞創 國朝改今名

汾陽王廟 在縣治東北水關外唐咸通中銀青光祿大夫上柱國

光州王想從兄審知節度閩部攝令長樂奉所祀郭令公而來家

於芝山之陽卽山北爲廟梁開平四年刻本廟碑銘於廡上廟號

福惠元至正辛卯重修明洪武甲戌知縣楊以忠重修隆慶六年

知縣蔣以忠新砌廟道崇禎十三年圯知縣夏允彝捐俸修建署

縣丞事翟國麒爲新神像明邑人劉沂春記芝峯之麓林泉鬱秀

今幾經葺治邇且就圯崇禎十一年夏夏侯泄茲土新砌之試葺爾也游刃有餘值虜寇交訌之秋軍興告急侯不擾民而饒用克

長樂縣志

卷之八

祠祀

三

秩祀

他如造士興文剖冤剔蠹振窮乏恤疲癯靖海氛詰逋藪城要害廣儲備彰善癉惡表樹風聲凡可爲吾邑計者力靡不罄未期月政通而人以和尤念成民而致力於神也新文廟飭賢祠諸廢興矣拜汾陽王祠下穆然有鼎新之思焉諸父老爲言士民於王有求必禱禱必應其最異者嘉靖閒倭薄孤城從高瞰下靴尖可踢圍中數萬生齒誰不岌岌者王顯其靈旌耀於壁壘金鼓以齊步伐夜則燈火明滅行校雜遝隱見廟中倭以有備也驚而宵遁此城守人所共見傳至今不衰今之旣庶旣繁王實生之不然甫中玉融城非不高也屠戮之慘談之寒心其能忘王乎侯聞之作而曰而不言余固將新之矧著靈如是耶令公奠李唐於再造洗吐番回紇之腥不汚中原功蓋天下千古所欽祀之非諂血食於茲能使島夷奪魄而邑咸甯威莫震焉德莫隆焉余泄茲以爲民也樂非令公所泄乃以廟食之故而大生全之眞足愧世之受若直而怠若事漫不爲民加意者可合其廟弗治乎取之官而帑無餘積斂之民而私鮮蓋藏於是慨捐俸貲鳩工庀材完其舊圯增其未備命耆民周如汀等董之不二月而復告成廟貌輝煌視昔有加夫文卜龜之藏而臧孫蒙譏斷徂徠之松而奚斯用譽古毀吳楚淫祠而夏禹太伯季子伍員之祀不廢謂平成永賴忠孝可傳也侯具千古眼宏濟曾所興建非僅飾觀異日經邦變理不必同合公精之相告殫心爲民未始不一也侯契令公之靈其致力

於神者周令公亦格侯之誠其成全吾民者又甯有艾乎吾儕何幸而際侯是舉也侯將膺不次之擢矣繼侯而逝者其有感於斯乎爰因諸耆之請援筆記之侯諱允

國朝乾隆五十九年大雨

溪漲廟宇損壞里人重修後座併前楹道光二年重建大殿增祀

王第三子駙馬贈太傅暖咸豐十一年增祀王第三子長孫御史

中丞名鑄諡文愍

按神於咸豐辛酉年五月閒託夢於里人自稱

平公主生余兄弟四人余居長名鑄妹為憲宗皇后元和二年余擢進士第遷太常寺少卿除御史中丞十三年邊寇竄進中原聖天子命父征剿余遂代之於七月十一日遇害軍陣中鄉村耆老藁葬於沙邱生不能立功於朝廷又不能承歡於膝下孟子曰浩然之氣塞乎天地之間我不孝而且不忠惟一點浩氣留至於今云云邑人林道照檢查唐史及尚友錄實有其人感其靈異立像

增祀

熊公祠 祀典史熊廷用在城隍廟左畔明萬厯閒按察使司李思

長樂縣志

卷之八

祠祀

三

秩祀

誠發銀檄知縣萬編重修並置祭田

李思誠記余問人曰使宰相

則必應之曰此主藏令吏而已矣又問人曰使免置而為干城百里而為大賢乎則必應之曰此天下器而已矣然則官無卑而不鉅也事無瑣而不宏也材無鮮而不廣也斥鷃羅鷲而能為鵷谷之鳴則謂之祥鸞瑞鷲可也小艇星舸而能為長風之駕則謂之龍航鳳舸可也熊贈公諱廷用江右豐城人初任湖廣東安後補長樂問其官則幕史也問其學則服佩先正而得統於吾道者也問其政則釐奸興利禦寇安民而種種奏諸善跡者也羅念菴據臯比倡教匡廬之閒先生遊其門為高弟得其正修大義以視躬淑世無所不善者程伯淳主簿鄆縣能使賄官望風解綬周濂溪知南康決一疑獄而人恆恐以汙善政為恥朱考亭提舉浙東而立社制倉訪民隱修荒政事事皆有法而先生深於理道平居孝友異常固有鄉志可紀其官茲長樂也雖所處稍屈獨振衣干仞冰壺秋月纖塵不染其舉動輒同周程輩家法世族有大訟多倚金錢株連不解公不用鉅筭破奸一履其地用片言為剖寃得公而雪其單騎下訟無異單騎下虜也又時時出鏹金俸餘贍貧生贖遺孤不吝也屬島夷內訌起閩海躡福清遂以其勁指樂而樂之守令主帥畏賊鋒為電熠縮腕為堅壁計其視環城外之老稚婦女仰城上號泣而不得進者曰甯以失吾民不得過雷池一步

也公獨忿然曰奈何棄吾百萬生靈為賊刀環上用哉遂開門延納之而又徐治墨守復出數奇以創賊賊是以垂橐而去不敢窺樂樂藉以安樂濱於海馮夷煽怒則桑田為海公築塘捍之併以資漑而濱濶二湖濶濶泓流至今有黃鵠之謠矣先生於樂小史也上有撫按監司下有刺史守令皆據高牙大纛懸旌列仗為一方山斗微吾先生者曾不能為斯民平冤滯起溝瘠民幾怔怔餓賊腹填溝渠不得完首領以終於是民之覆盆而見天日者指先生曰此非史君也乃吾之明執憲也民之孤貧而得帖席者指先生曰此非史君也乃吾之孔迥父母也民之免戈鋌享河洛而得抱舖者指先生曰此非史君也乃吾之賢司帥也夫以一史君而有執憲父母司帥之功焉所謂官無卑而不鉅也事無瑣而不宏也材無鮮而不廣也固宜樂之民至今祀之不倦思之不置也余自分藩來民有議新其祀者持牒請余曰此吾樂熊史君之祀百世俎豆法宜更新即今思城公父清風偉績後先繼美者余躍然喜曰是吾祖公也吾佩其子德深已昔朱仲卿死以桐鄉民愛之謂後世子孫奉祀我不若桐鄉然則為仲卿子謀者孰若新桐鄉祀哉余表揚風厲不敢有愛為發金錢屬長樂萬邑合眾心叶羣力卜日鳩工合棟宇煥然一新別置祀田三畝付之守者使樂之士君子永瞻其道範而老稚婦子日賽

史官董其昌扁曰兩祀

長樂縣志

卷之八

祠祀

三五

秩祀

千秋

祭典詳
學租條

夏公祠 在水仙王廟旁祀明知縣夏允彝後圯基存

地租見
學租條

馬還初生祠 在縣治上巷西明季閩邑公建前後二座各三間

國朝乾隆二十六年馬家重修 一在縣治學宮東南曰懷德祠

一在縣治南關外稍西曰通政祠二祠僅有基

地租見
學租條

西越雙清祠 在五賢祠旁明崇禎間知縣夏允彝將鄭公尚友所

置講堂舊基建祠祀嘉善李公奇珍及鄭公兩公皆西越人後先

三十年為士民所共稱其清相類故合祠以奉之

夏允彝記雙清
之祠以祀武塘

李公四可武林鄭公月菴余蓋於兩公之治邑知直道在民不容掩也余以崇禎十一年來蒞茲上去鄭公僅一年去李公且三十年矣然士民語賢令必舉兩公他令不得望焉余每庭決事士民相訾詆輒曰若人也非良鄭公嘗創之矣其事有舊贖者必曰斯

事也鄭公嘗剖之是歸曲於某若以鄭公言必無誤者余有所興
革之士民即又輒曰斯利也李公嘗興之於今漸湮斯害也李公嘗
革之於今復起若以李公所措施無不當者聞及他合事則曰某
公事豈能遁公腹中耶嗟乎李公雖貴為京卿今沒矣鄭公平擢
司空屬亦旋沒民何所私於二公哉三十年來吏斯土者何他無
所稱述也余友黃五湖台建陽語余曰建民之道前合亦如斯言
及前賢合沈弁邱事必曰是沈公所嘗云云也及他人輒云此在
公腹中耳五湖云吾輩慎行事毋令異日又入後賢腹中哉旨哉
五湖之言其吏治卓絕有以也夫予既鑒於是益用廩廩因詢諸
與誦熟知兩公之政李公精穎絕人觀一人即終身不忘既去長
二十年民有偶過武塘者公望見即曰此長邑某人也吾嘗一見
今胡為乎至此在邑剖訟獄如神凡民所願興而不得願革而無
從者公悉為施行之所欲與聚所惡勿施公實有焉鄭公學道人
也惻惻無華以誠與人久而民信之嚴而不煩執而不窒其治事
也皇皇無須臾之暇此兩公之異致也若其潔以持身慈以字下
遇早步禱歲不告凶訓士以禮不為輕徇則兩公所同也余聞兩
公在邑時不逞之徒有怨誹之者幾搖其位既去其民益思之身
歿而論定彼誹謗者安在哉即不自知悔眾共非之莫敢揚其言
也余是以知為吏者在勉為善而已其不善也威不能劫民如所
謂在公等腹中者微詢斯及之矣其善也即執三尺法以身任怨

長樂縣志

卷之八

祠祀

三

秩祀

怨之私終不勝誦之公久而益著吏亦何憚而不為善哉李公與
余同邑人鄭公與余同年友也然樂以兩公告後人非阿所私祠
在五賢祠之旁鄭公嘗命林尚孝於此
置講學堂鄭公去陳懋漳為竟其工
嗣圯遺址與五賢祠相混

歲徵地租於學

三賢祠 在三都鳳山下宋淳熙閒敕建祀先賢陳宋霖陳枏陳合

國朝康熙丁巳重建嗣圯乾隆二十七年知縣賀世駿領帑重

修邑人謝瑾記邑之三賢祠有二一在晦翁巖祀晦翁與二劉先

學直接孔孟閩中學者多宗之而吳航之奉為師傳者尤多元滂

名宋霖宋紹興進士合同安朱文公為簿日相與切磋琢磨講明

義理後陞秘書監書問往來不絕自修乃其家孫名枏隱居不仕

受業朱文公之門早歲聞道力行不倦無忝祖訓維道則又自修
之姪名合官樞密傳朱子之學於自修先生學深理窟文為時宗
是晦翁以孔孟之學為學而三先生又以晦翁之學為學其有功
於各教也彰彰可攷自宋淳熙閒敕命配祀郡國而外又特建祠
於三先生之鄉凡欲使世世子孫得以溯道源而志家學所由來

也歷世既久棟宇漸頽康熙丁巳裔孫陳善翼朝端等嘗倡族人修之時芝嶺房裔孫陳魯生婦李丙姐亦捐金百拾肆兩復充祭租壹百七十六石五十筋蓋即婦人女子亦尚知崇先正而綿祀典也者嗣是而後子孫散處屢議修而屢止前邑侯袁公儒忠戴公永璞見其日即朽蠹每欲新之皆未果乾隆十二年颶風大作鳥鼠伊威之所巢穴者俟盡於跋扈將軍鞠為茂草已閱一十餘載矣丙子夏邑侯賀公涖任謁祠地而心焉傷之乃訪其苗裔相與籌畫請建莫不以再造為難而公獨慨然具文申請 列憲聽其議而下之歲辛巳奉

詔發帑重修爰鳩工庀材蠲吉於是冬之十有一月復諭裔孫陳必起等赴散處子孫各量力捐助以益其不足歷壬午黜聖垣墉舊規乃煥然一新焉竊聞之有功德於民則祀之又聞諸穀梁子曰宮室不備不敢以祭若三賢之上承先緒下昭來學一門之內相與繼繼繩繩其功信可與晦翁並傳然非賢有司貞教宏化留心於經制祠祀則前哲且幾委於荒烟蔓草後之人又孰從而識之而祀之以是知賀公之功又當與三賢同為不朽而三賢亦益藉以不朽矣賀公豫章人名世駿別號相臯已酉科舉人裔孫陳必起陳文麒陳元輔均與有勞績例得並書

楊公祠 在四都祀楊州都統使夢斗公及其兄琦弟叔濟姪次鄭

長樂縣志 卷之八 祠祀 秩祀

公死難於楊子江飛魂還故里傳夢於父老眾咸歎異為建祠於

故里廬墓之側扁其額曰敕封都統大使宋進士文章節義祠凡

有祈禱輒應 國朝乾隆二十二年里人重修 事詳本傳○道光

祖林倡 捐重修 一在十都歧頭 順治間建乾隆間重建咸 豐三年里人李正翔等修 一在大宏

里厚福 一在梅花澳

黃勉齋祠 在十一都青山下本勉齋先生舊宅康熙三十年即其

地建為祠乾隆二十七年知縣賀世駿領帑重修道光二十四年

族人鳩貲重修裔孫見三榮庚董其事

三忠祠 在十九都江田陳氏南陽祠之東祀宋忠義陳公榮偕子

宗傳姪老成及一時殉難者百七十三人 國朝乾隆二十三年

知縣賀世駿詳請奉 旨重修二十七年復詳請每歲撥祀典銀

三兩在牙稅項下開銷咸豐九年族人捐貲重修

林忠烈伸蒙祠 在德成巖明萬厯乙卯伸蒙裔孫有楚倡脩精舍

關建西廳特祀伸蒙 馬思理聯云公為卜築有斯巖想當年續孟

日攀籐枕石也 因夢寐先生 國朝乾隆五年知縣廖興鎮領帑重修二十七

年知縣賀世駿領帑重修

三賢祠 在方安里即龍峯巖明提學潘璜命知縣曾銑建祠祀晦

翁及劉砥劉礪故名三賢祠 潘璜記龍峯乃樂邑北西巖地傑境

宋徽國朱文公因避言寓茲二劉兄弟存菴在軒從遊構書院講 維新呈請修葺予按其實行縣裁處而重新之時知縣事楊州會

長樂縣志 卷之八 祠祀

南翼以太常西北夾以籌峯後枕鹿屏前面碁山雙湖擁列殆天

地造設為三賢養浩之區將以起道南萬世之會者也三賢功垂

不磨固宜紹修先哲所寓以闡厥跡使 後圯知縣萬編因教諭袁

文紹之請捐俸再建 明福清葉文忠向高記晦翁巖故名龍峯宋

生避僞學至此二先生師事焉巖甚奇峭幽絕透迤而上可數百

武有石對峙如削為石門考亭先生手書讀書處鐫焉石門之上

有祠祀考亭以二先生配祠有司歲時展禮其巔有海天山月亭學

使者潘公所建久之祠亭俱圯孝廉袁公來教邑庠以祀事至不

勝懷賢舉廢之念白於邑令萬侯萬侯慨然鳩工庀材一新其舊

於是地勝益增而三先生之俎豆益虔且悲劉之裔孫諸生自源

輩羣走而請於余曰茲巖最爾以大賢之過化聲施海上即吾劉

先人亦藉以不朽其不韋為纂葬以廢春秋秩祀則賢令尹力也

願先生一言昭示來茲余聞萬侯在邑清風惠政播於輿人而尤

銳意興除百凡釐飭其大者如繕學宮復侵地改直衝之橋移反

射之水邑庠形勝煥然一新士子之久厄者遂聯翩得捷侯之造

士興文加意學校以教化為先務大率如此而袁君又以文學行

誼率先士類與侯同心協力茲巖之廢而復興亦天為之也今新

學繁興異論肆起有能彈射紫陽詆訾前哲者則世共以為高遂

令國家二百餘年尊崇宋儒統一聖真之功令盡廢格不行士習
人心日以頹壞余甚憂焉而力不能挽視侯與袁君茲舉大足為
紫陽生色且使士子聞之亦知濂洛一脈雖當剝蝕之餘猶有賢
人君子為之表章即其足跡所經之地師弟講習之區猶能使數
百年後人之景慕不忘如此其所關於世道良為不小是以因劉
氏諸生之請不辭而紀其事侯各編直隸丹徒人袁君名文紹建
陽人役肇於甲寅季冬落成次年五月初一也詩寂歷巖扉畫不
局昔賢曾此授遺經年深但見松杉古人去長聞俎豆馨蒼蘚剔
殘餘片石白雲踏盡出孤亭一從鳧鳥飛來後夜夜空山有客星
其二松逕蕭蕭路後盤芳祠瞻拜肅衣冠天涯何代無通客海上
千秋有講壇古成梅花殘月曉芳村荔樹早霜寒懷賢莫起前朝
恨留得名山此日看知縣盧龍雲詩聞道龍峯勝公餘得共攀石
門高並對嶺樹翠相環海色蒼茫外湖光渺靄閒此中有佳處况
是古賢關知縣鄭尚友文古今治統道統有主持即有輔翼是故
明王應運名世挺生聖學昌隆高賢蔚起至不爽也有宋中葉著
作日繁各以其說混真毫釐千里之差朱文公衷其是而集大成
當日二劉先生承家學之淵源篤志敏道同登乾道進士會文公
避學遊閩二劉先生樂道忘仕築室龍峯巖延就講誦以禮學受
事門墻著有王朝禮編七卷凡文公垂世禮制多所裁定臨終猶
惓惓以未竟之業囑勉齋先生轉以相屬夫禮體中而用和敦厚

長樂縣志

卷之八

祠祀

五

秩祀

以崇之則性之德也克己以復之則仁之實也而顯設於日用人
倫之際則修身範世之大綱維也蓋心之官則思思之所發不授
於節則自意念以及耳目手足雜然亂營靡然罔所植立記曰禮
至則不爭甯獨人已之間亦謂形神體用之各安其所也當年陸
與朱辯陸終不勝朱則朱之禮教密其實際有殊焉耳惟二先生
體斯身者真確而詳盡斯發諸言者切實而明備故文公始終倚
以為重禮教一日不泯二先生之遺澤一日不衰粵稽歷代功臣
皆得配享太廟國朝如康齋白沙諸正上躋十哲甯僅僅龍峯之
祀遂足以隆崇報乎哉邑東有五賢祠今二先生薦馨地余葺其
宇而授業焉亦既彬彬矣復飭巖祠於龐雜之後六年內三登先
生之堂嘗扁曰為道得人瀕行弗忍去為闡斯
文在茲之實屬乃孫泗哲佐哲而弁諸巖上 乾隆八年知縣袁

儒忠領帑重修又建接官亭一座文昌閣一座講易堂一座二十

三年知縣賀世駿詳請給帑重修

互見龍峯巖祭典附載學租

里祀

真武廟 在河陽柿浦橋道光二十五年紳商捐貲重修填砌廟堦

特立華表前後三進前蓋戲臺中祀真武旁祀天后後祀觀音餘地新葺僧舍規模宏敞固河陽之巨觀也紳士陳義謀陳方文經其始陳康勉陳聲琚鄭用雅等董其成一在西關外乾隆四十年重修

光八年重修一在八都即當陽寺 一在九都 一在二十都壠下

一在二十一都壠頭 一在化鯉橋 一在沙塘坂並祀天師

一在方安里雲龍橋 一在二劉村 一在潭頭村 一在澤

里嶺 一在文庄 一在岱西 一在鰲峰巖 一在大宏里沙

堤 一在厚福 一在二十四都下店 一在梅花新城中

泰山廟 在西隅天王寺西畔祀東嶽大帝俗傳為祀唐東平王張

公巡之神謬也乾隆二十年建 一在溪下 一在二都閘兜 一在村

長樂縣志 卷之八 祠祀 三 里祀

中 一在九都湖山 一在十都斗門旁康熙間建 一在十四都渡

橋名寶林庵 一在雲路 一在雲路西山旁道光八年江姓建 一在

十八都壺井 一在二十三都金墩 一在方安里二劉村 一

在澤里

五顯廟 在下槽橋上明太祖都金陵即都中建十四廟一曰五顯

靈官廟以歲孟夏季秋致祭今天下之崇祀五顯者實由於此俗

說神以救母罪愆與目連尊者同一大孝登正果號華光藏主妙

吉祥如來然則天帝不離人倫赫濯亦極仁慈耳義固可祀也乾隆

甲子年咸豐庚申年先後重修 一在儒英巷宋時建著有靈跡嗣圯咸豐九年

葉寶雲題其額 一在府埕頂 一在坊口崎嘉慶十一年修

日儒英古跡

一在東關外 一在十都福湖 一在石馬 一在十二都營西

祠乾隆開石姓建 一在新甯橋邊乾隆開石姓建 一在九龍庵南道光開陳姓建

一在十三都鶴嶺 一在雲路村 一在十六都華藏寺 一在

十九都靈峰山明謝杰出使琉球奉其香火前往數著靈異 一在二十三都皇恩寺

旁 一在方安里潭頭村 一在梅花

教養廟 在東關外嶺口中祀蒼頡后稷建自元時嗣圯遺址存

國朝道光開里人張永揚倡修陳承輝等董其成

三聖廟 在吳航書院之左乾隆二十一年建祀漢關帝唐狄梁公

宋包龍圖

國公廟 舊名太尉廟在射圃崎上祀明魏國公俞通海邑人阮琳

長樂縣志 卷之八 祠祀 三 里祀

自外省奉其香火歸數著靈異鄉人立祠祀之乾隆二十七年增建後座四十八年

嘉慶十七年先後重修道光二十九年林絢雲張連城張金鑑等倡修改建文武門複道亭規模一新

水仙王廟 在縣治東南水關內順治初建祀楚屈原唐王勃李白

乾隆二十五年附近居民修道光開知縣盧擇元捐廉重修 一在梅花城內

種芝宮 在太平橋上乾隆十六年創道光七年咸豐間先後重修 中祀臨水夫人旁祀

痘疹二神東邊隙地新建社公祠

金斗廟 在西隅坑尾巷中祀伽藍道光開修

高隍廟 在西隅宋元豐開縣尉高氏奉其所祀之神曰高將軍來

邑遂立廟祀之明永樂三年鄉人重修嘉靖中燬鄉人重建

南山廟 在塔坪山宋代建祀社稷神乾隆二十四年修道光開重修

利孚廟 在西關外元元統開主簿劉伯貞建後廢

祠山廟 在縣治東南元至正開建明萬歷開移於十洋街之東南

通志載云神姓張名渤生西漢末游苕霅之間歿而為神顯於廣德州之橫山閩人祀之頗著靈蹟

一在十八都

壺井百丈巖之左里人林瓊 一在十九都長林湖

里人林瓊

毓麟宮 在城隍廟之左道光二十年重建中祀順懿元君謹按神

名靖姑下渡陳昌女母葛氏生於唐大歷二年嫁劉杞卒年二十

四古田縣臨水洞有巨蛇時吐氣為疫癘忽有朱衣神人執劍索

蛇斬之鄉人詰其姓名曰我江南下渡陳昌女也忽不見眾遂立

廟於洞上凡禱雨暘驅疫癘求嗣續莫不響應宋淳祐中封崇福

昭惠慈濟夫人賜額順懿世稱為臨水夫人是也神祠各都圖均

長樂縣志

卷之八

祠祀

三

里祀

有之並祀高李夫人或建宮專祀或附于土穀神之廟今錄數處

以見其概 一在東隅箭道之左今圯 一在吳航書院旁明嘉

靖初創 一在縣西河南山福泉堂舊址 一在西關外上登瀛

境名斗山宮 一在四都東渡名臨水宮 一在十都龍山今移福益山

一在十一都青山下 一在坊兜聖泉古蹟 一在方安里二劉

通濟廟 舊在西關外宋端平閒建後移為臨江館遷祀其神於郭

門樓上嗣復建為駐節亭通志載神唐末人林浦浦避地海濱凡

斥鹵之巔島與之涯皆鑿井以給行人人謂之林公井及卒甚著

顯應里人祀之有司上其狀賜封今號 一在十一都唐大中十

林崇禮創以祀通濟神故鄉人呼其祠曰崇禮宋太平興國元年重創今名崇禮境

白馬王廟 在縣治北關內 乾隆五十三年同治三年里人先後重修 通志載神為漢閩

越王郢第三子有勇力好騎白馬人稱為白馬三郎時閩縣桑溪

里東山之潭有大鱸為民害王挾弓矢射大鱸鱸纏以尾人馬俱

斃土人立廟祀之禱雨輒應宋熙甯閒封冲濟廣應王紹興閒加

封靈顯紹定閒加封孚佑王則其崇奉固已久矣 一在二都阜

山 一在三都岱邊山腰 一在岱邊水碓上 一在珠湖龜山

口 乾隆五十九年建 一在九都灣裡 一在十四都白眉村 乾隆閒里人王子貴

等建道光二十二年貴子舉良倡修 一在旒峰頂 一在旒峰西山 乾隆閒建嘉慶十八年同

治五年里人王資裡王尚貞王守花先後重修 一在方安里楓林村 一在澤里烟臺

山下 一在大宏里 道光閒建

長樂縣志 卷之八 祠祀 三 里祀

英烈廟 在國公廟之右按神為唐天寶閒樂部雷海清遭安祿山

亂抗節不屈死俗稱田元帥改武裝實屬相沿之誤 國朝邑人

林瓊堯元帥廟楹對云意氣依然今學者風流原是古忠臣附錄

備考 一在二十一都越王山 嘉慶已卯重建

瑞溝祠 在二都後澳神為宋莆田縣法曹時有犯法者數百人當

刑法曹陰縱之獨抱文案溺溝而死縣令上其事於朝立祠祀之

明景泰乙亥知縣朱紱改建

濟州廟 在四都嵩山嶺唐長興初建祀水神舟人往來率祈禱於

此故名明宏治閒改祀天后 國朝順治十年移建坑田渡頭廟

仍舊名

翁前廟 在四都東渡

後義姑祠

在六都

明邑人謝杰傳義姑者邑六都人陳希聞季女也希聞二子及子婦俱蚤世諸孫未離襁褓

姑憫家步艱難矢志不醮以撫之日繕女紅為生備歷艱辛而不悔卒成諸孤亢陳氏宗余謂史稱姑姪不如子母固矣然可論其常非所以論姑也世之存孤者以母育子君子猶或難之謂其義不可已而能不已也若姑未字之女非先王禮法所禁特骨肉凋謝乃依然終身不忍去其孤至性天植殆義猶可已而不可已者視貞母立孤倍難之矣義姑之先陳姓因贅而冒林實與鶴峰之陳同祖陳在鶴峰為著姓有兄死嫂嫁姑為立其孤者亦稱義姑云嘻寥寥千載信史不傳之事同出一邑又同萃一宗相望於星溪紫薇之間豈山川孕靈篤生明淑俾與烈丈夫偉男子並垂不朽者與因漫書之以俟乎司彤管者

植柱廟

在八都唐開元中有大木沂流而上漁者心異之取置石

室中望之若植柱故名有洪氏女浣紗其旁為蛟所吞其家訴於

神忽迅雷擊蛟得女屍於蛟腹中

今破石潭即其遺蹟

洪氏遂舍宅為廟刻

長樂縣志

卷之八

祠祀

三

里祀

所取木為像祀焉宋景祐中縣尉王僕以禱雨獲應倡捐重建

潘奎

記別

嗣祀

國朝乾隆七年重建並前座複道亭

桂林祠

在十一都宋元豐二年建前有古桂故名

元明祠

在十二都有兩境祀土穀神一曰元明東境一曰元明西

境即古新甯縣治也

祈雨祠

在十三都黑龍潭側宋元豐元年建歲旱于此禱雨故名

今圮

練忠祠

在十三都祀明忠烈練子甯永樂閒子甯後人避難於此

建

前義姑祠

在十三都為陳碩翁女中建

明鄭世威記夫孝節天性之良閨門風化之始也繫

自古昔女有師氏理陰教以章明婦順少長貴賤馴習姆訓故二南列傳歸美貞淑彬彬乎盛矣降及叔季大道希曠內則教衰閒見一二女子踔乎孝義匪躬之節不無重有關於風化也余昔宦浙東訪故老於元得一人焉曰金女汝安者年及笄值父母老且病念兄第勞於行役矢心孝養迨二親歿年已五十竟不嫁而卒是可以觀孝矣於我朝國初得一人焉曰趙氏大娘者年十八撫幼弟淫成立又撫姪英繼沒復撫英子諫奕世賴之是可以觀義矣之二人也志行殊絕炳炳烺烺有烈丈夫所難能者余將以是謂寓內不多得也適陳君闡齋攜其祖家譜徵余言為修義姑祠記余得次其纂述因諦論其世云益知天性之良萬古不泯疾風勁草敢謂世無其人夫以姪坦嬰孩三月適值母哭父與兄喪明之日纍踣阽危勢亦亟矣姑顧以一女子周旋其間迺能獨當家事直以養母與姪自任之死靡他竟之力抗豪右扶植艱阻使垂白無恙而弱孤有賴噫是又合金趙為一人而孝與義蓋兩得之矣況微節奇氣自少則然不為烈女中之尤難者乎夫於中葉式微之後以身任數百年宗祀之重由是剝者復仆者興而寢熾寢昌之盛要亦本於此心孝義之誠有以篤其慶耳非有加於天性之外也夫人孰無是性作而趣之將自求之是故凡為天子為人臣者可以風矣況為其子孫者得無持祠百世祀之乎雖然猶未也吾知其一念相尋之遠殆有得於肇祀之先者惟雖教愛維肅

長樂縣志

卷之八

祠祀

三

里祀

教敬其誰不恪共朝夕而忠孝廉節之士行將濟濟然於對越駿奔之頃矣則於是祠也不尤有烈光哉姑諱與平生履歷暨先達詞大略前記已詳茲故弗及云郡人尚書林廷楫記天地間流行二氣五行而已木德始東仁也義屬金成於西焉是故仁該五德而義所以成之義之德為剛為直為斷為嚴毅為幹固人生得義氣多者則其性必貞其行必卓可以貫日月可以烈金石蓋有不火熱不冰寒者矣予嘗博觀史傳見所載忠孝貞烈姓名未嘗不改容深歎焉蓋嘉其得義氣之多而綱常人紀賴以植立者也昔予年友浙江道監察御史陳君文試長樂人也蚤歲與予同宦京師因締緡焉一日出其家譜示予曰試有六代祖姑名中號孝義姑年十二有志操生於元末父兄繼亡而遺孤尚襁褓嫂懷他志不念所有義姑諭留之不從乃痛誓終身不字期乎上養寡母下以育孤於成族人有利吾產者雖屢欲害孤而迫嫁之卒莫克奪其志抵洪武二年九月九日以壽終享年三十有八厥後孤育濬濬育俞俞育炳至炳始育五孫曰墀曰塾曰壘曰增曰均遂派為仁義禮智信房者五抵試今日流衍益蕃有以仕宦顯者有絕德名世者有仗義恤宗族鄉黨者繩繩彌殷皆姑不字之力惜當時幽德獨抱而莫能上聞國朝初興褒典屢降而我姑盛德獨遺焉是可恨也今試與兄秋鴻同廁科名亦姑德之所貽者敢忘所自乎試將白其事於朝而莫知所聞也其何以教試予聞之駭且慕

及三復其家譜所載行實乃喟然嘆曰予閱貞烈多矣未有若孝義姑之行尤為超卓者也蓋凡以貞烈稱者不過奮激於一時砥礪乎一節焉耳今孝義姑年方幼冲志存宗嗣上養厥母下撫厥姪以一女之身而克綿父兄不絕如綫之脈非大孝天植性行純摯者曷能如是乎吾因於其養母育姪也而嘉其能仁焉於其堅貞不字也而嘉其能義焉於其母卒服喪哀毀骨立也而嘉其能禮焉於其備患詳密卒以翼孤於成也而嘉其能智焉於其始終弗渝夷險一致也而嘉其能信焉五者備德其至矣故謂義姑為女中堯舜可也奇操卓行烈日秋霜豈尋常徒甘苦節者可媲美哉夫以姑之功德如是雖在百世後猶將表之況君為六世孫乎且當今聖明御極崇節褒義雖在宋元猶將旌之況姑又為國朝之人物乎聞之於朝誰曰不可文試喜而退事將上而卒於官惜哉故予每高其義而深慨其不獲表於時乃為之載其事於三山續志俾其後世子孫有能繼其志者得有所據焉以為詞也抑或有賢大吏賢守令崇重節義者得有所考焉而為之闡以旌也逮嘉靖丁酉臘吉五房子孫懷報本之誠建祠於祖第之北為千載祀圖賢田以充歲時之祭越次年而祠成適子歸老於家文試君男浙江甯海縣令陳子良琛謁予求文以為記余曰義姑之德獲聞於令先君舊矣茲祠之建亦以義起者也揆之情理俱協輿論允孚子雖弗衍言其敢無詞以贊謹頓首銘之曰岡之崇義姑之

長樂縣志

卷之八

祠祀

三

里祀

德也石之堅義姑之節也松柏之芳義姑之實也江河之流義姑之澤也嗚呼休哉遂記之何治歌古者魯義姑棄子存兄孤雖稱仗大義此身猶有夫今聞陳義姑矢志撫兄孤劬勞四十載終身不適夫大義彼此同奇行古今無堂上有盲親殷勤飼其舖孝弟萃此身綱常賴以扶雖曰姪之姑一身當父母雖曰女之流尤勝烈丈夫綿綿陳望族干祀凜廟謨皎皎汗青在萬古仰女模何日拜芳祠一奠此清醑邑人陳時範歌程嬰與杵臼死易立孤難一死固不易立孤胡言難死事事可訖救兒多苦艱彼猶丈夫節高誼在人寰而有處女流似茲焉得攀焚香誓廟時忠義摧肺肝哀我娘母寡悼此猶子單兒啼方呱呱置之焉所安激烈見顏色黯慘天地寒鄧公棄其子男兒骨肉拚夏女泣曹氏彼乃奉其繁生男合女苦生女憂男患至今蒙奕葉世世承纓冠念初如綫緒有此姑心丹沒身竟闔闔義重論邱山我亦有義姑生年仁廟間嫂兄四淪喪一堂雙掩棺我祖四五人兄弟幼成班寒啼衣與被饑啼饗與餐我姑恤諸祖哀哀惟痛酸矢心願不醮永撫合相完沒年四十疆祖行各斷腸執喪比阿攸禮葬百丈岡至今霜雨淚歲歲沾衣裳前姑恩莫報後姑恩不量前姑堪比爺後姑堪比娘前姑今表示後姑慚未揚題詩頌前姑並託後姑芳願將雙節義付之太史章 乾

隆十年重修

雙節祠 在十三都為陳氏石林二節婦建

明邑人鄭憲傳天下媼

蓋惟中饋貞吉無事稱述而已惟不幸蚤失所天家步多艱而能金石其志松柏其操則足以表範于閭闈風勵于俗化於是而託於文以闡之詩以紀之又從而詠歌咨讚之庶乎隱者彰微者顯歷萬世而名不湮沒也余於玉溪陳氏雙節有慕焉婦姓石福城河東人茂德幽閒幼承姆訓習孝經烈女傳輒能記誦父母愛之擇所宜配得玉溪陳處士洪字子大歸焉既歸孝于舅姑克相夫業睦族展姻賑貧卹匱鄉人盛稱曰陳氏有賢婦矣無何子大公以天年卽世氏猶未娠剖心泣血誓終奉陳祀而養其舅姑越三月舉子植乃抱哭曰吾分當死為此藐諸孤在未幾舅亡喪事如禮植既長娶婦林氏與頭人生二子燭燁家藏有百花壺古畫邑侯張欲攘之植弗與乃攜攜其罪竟死非命氏對婦隕涕謀嗣寬于神京族黨憫其齒之衰而行之遠也止之曰燕閩八千里而遙子死已矣閒關險阻亦何為哉氏曰天乎吾奚忍吾兒斃于貪虐之手而使之含冤於地下也乃手持二孫而囑其婦曰汝其善撫之無以吾為念也婦泣數行下曰所不與夫子相從以鞠育此孤者禽獸之行也忍為之乎第慮吾姑日暮途遠益重死者不瞑之目耳相向而慟聞者酸鼻及詣都門天子廉其冤而下邑侯吏議優復其身歸與婦相依雙村寒校一燈夜織自緝纊組紉之外不

長樂縣志

卷之八

祠祀

三

里祀

屑也撫育二孫長就外傅使習孝弟之行蓋自其寡而及老四十年如一日也天祚節孝煒子德隆領景泰丙子鄉薦典教四庠為天下師表門人稱之曰靜齋先生生八子讓石埭尹謹東昌郡丞談充郡二千石鑿長興尹讚貴州廉訪謬諧居庠有聲謹之子豫章廣東提舉談之子豪侍御父子兄弟一門之內印纍纍而綬若若卽所稱燕山五桂荀氏八龍莫或先之君子曰陳氏之興蓋未艾也余於廉訪君同舉孝廉十年而聚首京邸間出家譜指其大妣遺節命鄙言以傳之余惟女德之載諸簡冊鄒孟母尚矣次則柏舟共姜亦足以為世風者今按雙節而觀之勤於恤孤慈也捨身愬冤勇也厚事舅姑孝也別於內外禮也不易厥操貞也一身而眾善集焉宜可以與古二母齊芳並耀而祉祚流衍固其所矣異日觀民風者探而上之天子旌典行焉太史書焉以風天下孝節之心以肅萬古綱常之治未必不自茲啓之也吾固表之於世以示王公貴人不宜恣睢敗類以喪其所守又以示婦人女子苟有志節直足樹異千秋而廉頑立懦當並觀矣敬識而傳之鄙人尚書林瀚詩節哉二烈婦耿耿冰玉姿夫也先朝露仇貪子死之婦姑相對泣大厦以木支孤燈照壁冷雙杼織夜悲膝下牽兒呱階前掛蛛絲衣破不復補午過猶未炊淚滴聲徹天遑恤寒與饑堅節人難說廉寬聖得知海水因風慘松柏歲寒奇四序有推遷寸心無改移鬼神諒陰佑門戶振光熹固知孫才俊亦繇母操

持他年奏天子丹誥侈封地生順死亦榮千古愴民彝都察院洪
英歌泰山崔我可攀越滄海汪洋可航筏惟有玉溪雙節婦鐵石
心腸那可沒姑奔帝闕愬兒冤婦守深閨撫遺血霜寒燈影漏聲
殘雙梭苦織紗窗月從茲不施脂粉容獨與孤梅鬪清骨一朝紫
詰闡幽芳萬載千秋日月揭邑人謝士元詩姑婦堅持柏舟哀哭
夫哭子命何窮疎雨啼燈雙杼和嚴霜叶闕九重通節磨冰雪春
猶冷心剖金石血正紅乾坤正氣誰能並巍然萬古拜高風陳惟
裕詩天地飛塵落日荒婦姑雪涕共淒涼鸞沈寶匣秋空素機織
寒梭月色黃從教一死心何恨留得千年史有芳最喜聞孫光舊
業雙貞指日顯褒揚郡人刑科都給事姚銑詩死別夫君血未乾
愁將殘命撫兒棺乳姑謾道唐姜易圃闕休誇齊女難和膽熊丸
秋月苦淒心蛩杼夜霜寒雙雙烈節垂今古傳與雲初濺淚看侍
御王恂詩秋水冰壺絕點氛丹心奚啻徹寒空細思世道江河後
休說無人障水東更部主事陳良卿詩逝川東注何明迴白駒驟
隙何奄哉乍見紅英變白雪幾看青草生高臺於戲二母響玉節
精誠天地當爲開把持門戶席厥祉春暉郁釀扶根芟翼翼聞孫
表琦瑰報章有待來上台貞慈到此無遺憾敢將椽筆寫新裁邑
人黃循宗詩歲月丹心苦風霜白髮森柏舟如可續伐石鐫幽貞

靈通廟 在十三都宋宣和閒封陳通與弟靈王爵卽今東墘上境

長樂縣志 卷之八 祠祀 三 里祀

舍人廟 在十三都鶴嶺

法靈祠 中祀火神一在十四都 一在旒峰山側 一在東平村

忠懿王廟 在十四都旒峰 乾隆開建

方伯祠 在十四都渡橋爲明進士林恕官按察使司晉階布政使

司建

昭利廟 在十五都元至正八年建通志載云神爲唐觀察使陳巖

長子延晦乾符中黃巢陷閩神憤唐室衰微慨然謂人口吾生不

鼎食以濟朝廷之急死當廟食以慰生人之望旣歿祀於連江縣

之演嶼宋宣和五年給事中路允迪使三韓涉海遇風濤賴神以

濟歸上其狀封協靈惠顯侯賜廟額曰昭利舊志誤作招利 一

在方安里籌港

雙節祠 在十六都乾隆十五年奉 旨旌表卓氏鄭氏妯娌雙節

十九年鄭男副榜陳永書捐貲鼎建 知縣黃瑞鶴有記見藝文

林長者祠 在濱湖上南向乾隆十一年移建濱澗之閒西向三閒

祀唐進士倉曹參軍林鷗偕配趙氏及諸有功于湖利者

崇德祠 在長者祠左三閒乾隆十一年建祀巡撫周學健知縣戴

永樸

越王廟 在二十一都越王山之上 康熙三十九年重修

將軍廟 在沙塘坂

英武廟 在厚福陳塘港

長樂縣志

卷之八

祠祀

三

里祀

龍神廟 在二十一都太常山 乾隆辛亥重建

嚴長者光廟 按光嘗捨田為湖溉田四百餘頃里人祀之 在王花墩原名嚴湖寺 詳見水利 雍正

正五年建年久頽圯乾隆十二年里人捐貲重建 知縣侯海改其名曰嚴光祖廟督憲覺

羅滿保知縣張學尹衛良佐賀世駿各有祿主配享 一在沙堤

金吾祖廟 在太宏里里人林通位者 劉志作林植 有善行卒人莫知其

為神也宋初有寇至望見神人樹旗幟禦之遂退是日降靈于人

述生平及父母妻甚悉事聞勅賜廟額 一在十都魁龍山下

一在文庄洋頭

金舍人廟 在澤里

通津廟 在二十四都梅花城內

盤古廟 在梅花紫岐山

蔡夫人廟 在二十四都梅花澳相傳夫人爲琉球國人嘗夢神人書其掌中云東湧起風沙得道在梅花羅白與金舍相逢總一家明萬曆閒因織龍袍入貢册封精巧妙明懿德夫人召入京舟次梅花遇風登岸寓宋直家適朝命免進京旋病卒宋直葬之於馬鞍山時顯英靈土人立廟祀之 一在十四都旒峰山下

岳王廟 在梅花獅頭鼻神諱飛字鵬舉河南相州人宋中興名將封鄂王因不附和議遇讒而死追諡武穆

柏姬廟 在梅花龜頭山神爲元行省郎中柏帖穆爾女明兵下福州帖穆爾引妻妾登樓諭以大義合家殉難者七人女甫十歲亦

長樂縣志

卷之八

祠祀

四

里祀

與焉後人憐而祀之俗稱白雞小姐乃土音相沿之誤

土穀神祠 明制凡各鄉村皆立壇以祀土穀之神今鄉有社會改壇爲廟左祀土神右祀穀神其品秩大抵視其鄉之先達者古所謂沒祭於社殆其遺意歟

寺觀

天王寺 在西隅山北唐大中七年建初有檀木泝流而上牧童取之夜半發光里人林舒夢其木謂我北方毗沙門天王遂捨宅爲寺廉帥楊公額曰靈感天王寺後有大石勒寒巖二大字內有烟蘿亭望江亭清心亭樂壽臺松石峯枕流軒嗣圯隆慶四年僧重建經堂小軒二座寺與樂壽臺存 國初慕義伯王廷重建乾隆

二十四年邑紳柯瓊重修額曰寒巖道光二十八年邑紳陳聲琚鄭向奎倡修按唐天

寶元年西番寇安西明皇詔不空三藏誦經不空因言北方毗沙

門天王神通可以禦之會安西亦奏將戰時有金甲神長丈餘來

助因敕諸道州府城西北及營寨並設其像則其供奉固已久矣

宋運判蔣之奇天王寺詩晚向津亭泊畫船忽逢佳處在雲烟松

根化作千年石山氣蒸為一澗泉祖意共看亭下柏禪交同結社

中蓮明朝輿轎還踰嶺聊借僧房一覺眠明知縣潘府詩南山病

吏老猶狂中夜衣冠坐漏長一榻秋聲風送雨滿懷心事客思鄉

塵路望迷行且止雪舟興盡返何妨獨憐未了書生計待話雙親

鬢已霜邑人王恭詩炎暑不可度端居日方永同袍四五人共愛

山中靜飛閣軼氛埃叢林繞蘿徑潭靜熱已秋竹深午猶暝初沿

雙溪轉稍入空中境婉婉林鳥聲悠悠野僧定平生好幽玩盡日

愜佳興山水發清機風泉澹初性日夕徐徐歸雲間響孤磬宋縣

令董淵煙蘿亭詩小亭如畫起煙蘿曾約春風把酒過不謂登臨

訪泉石暫將愁斛此消磨縣合閑希聲枕流軒詩山出太虛水溪

原千古高眠窗喧客枕洗鉢濺僧袍夜月氣猶凜秋風聲更豪二

長樂縣志

卷之八

祠祀

聖

寺觀

年清賞劇欲別首頻搔縣合吳仲舉枕流軒詩軒瞰深溪對遠岑
子耽山水每登臨茲流不獨清塵耳當灑餘波洗眾心寒巖晚
鐘為十二一在大宏里響石山山有谷谷口可蹲數人中莫測
景之一避焉見神顯靈禦寇寇退於
洞口建石室題曰響石洞

觀音寺 在東隅舊為光祿大夫王想宅咸通間捨宅為寺內有石

屏及見江亭宋縣合袁正規見江亭詩地產靈芝古道場危亭陟

起負重岡江心遠疊通潮浪海外遙分異域疆繚繞

人家依縣市寂寥煙景認吳航倚欄望斷暮雲碧不見長安見夕

陽邑人造士陳偕見江亭詩雲端亭是燕遊場十二朱闌照碧岡

人在一番新世界目窮千里舊封疆碁坪拾匣城中市正德十五

年御史沈灼改為察院嗣改為內箭道

永豐寺 在首石山上明崇禎十一年九月旱知縣夏允彝因父老
言雲封首石即雨遂步禱於茲山果雨捐俸建寺以祀首石山神

寺基已定滌土出石有大石巍然適立寺中如首石狀眾以為神

夏允彝記周禮月建巳命有司山川百源以祈穀實旱則大雩山川社稷奠甘澍焉川者職以龍雨也山者職以雲雨也農事二月舉趾八月其穫需雨蓋二百餘日而龍二月于天九月于淵龍雨亦二百餘日終稼穡之候得雨助者咸推功於龍故郡邑禱雨之祀川為多云閩土常燠少寒田一歲再熟二月播之六月刈之也刈復播之至十月則又刈之需雨之日踰於他所而龍之能雨等焉余始合長樂之歲戊寅九月旱父老言東南十里有龍潭最神余禱焉不應非龍之靈於昔而不靈於今也龍固甚憫我民惟悴而非其時勿能庸且以為有職之者我必讓也父老又言縣治西北隅有山名首石雲至雨輒下宜能致雨者余又禱焉禱焉果雲既雨雨二日霑足晚禾卒全非首石之靈過於龍潭也亦非樂自見其功攘龍潭之功以為功也時無可諉勿敢曠焉將以佐龍潭不及也故知功因於職職因於時及時者職有所歸不及時者職有所謝職所歸者專之不為亢職所謝者避之不為怯而今而後山與潭務各竭其能因其時以盡其職而卒相與共其功豈不利此民哉若乃讖言所紀山鳴之瑞必有士弁天下者我明馬李二公符之則又山所獨擅非潭職矣余既以祀時言之立廟於山以祀其神而父老復請一言以壽於石余無以辭乃述其概如此時

長樂縣志

卷之八

祠祀

望

寺觀

率眾鳩工則諸生李春進等皆與有勞並為記其名於左復為樂章一合巫者歌之其辭曰首石兮嶙嶙築宮兮於今莘楣兮桂棟神宅之兮陰陰奠椒酒兮神來歆舞元服兮娛神心雲靈靈兮罪且霖振虛響兮流清音歲恆有兮無侵彼蒸士兮既掄於胥樂兮自今夏完涓辭時年九歲作嗟我首石巖勢崢嶸洲島回合圻岸奔驚清池碧澗飛溜縱橫靈神發響思皇以徵其二赫赫炎炎早魃為殃上帝不平司失厥常圭璧既卒皮幣既亡饑饉將臻元元用傷其三如焚如燠燠蘊隆家君不康爰祀上穹油油雲沐甘露濛濛民生既遂五穀斯豐其四谷風婉變乃雨乃陰沛霖沾良疇蔚新時惟建祀於彼山岑苾苾芬芬神用來賓其五神之賓敷祉於民永富爾歲永綏爾人斐斐嗣廢士子綿綿殷殷馨香上徹嘉瑞繽紛

南山三峯塔寺

在縣西隅登高山即塔坪山宋崇甯間僧造小臺

講經後邑人林安上同僧就故址作庵建炎間僧造浮屠七級

記別明永樂十一年太監鄭和同僧重修題其額曰三峯塔寺

吳遵詩百仞危欄霄漢連萬峯青落酒盃前秋聲不斷雙江樹暮色平分萬井煙天末鴈鴻真渺邈谷中蘭芷自芳鮮何當決此浮

雲外西望長
安在日邊
嗣圮

縣山寺 在縣治後山嗣廢

北澗寺 在水關外小有天
同治元年重建即夏公允彝所題介全寺故址也前有進香臺

甘泉寺 在縣東隅嗣廢

梅峯寺 在善壇亭額曰梅峯古蹟
嘉慶二年重建道光二十一年同治三年先後重修

資聖寺 在縣治後寺前有石橫澗上如船寺嗣廢

三峯寺 在縣東隅嗣廢

靈泉寺 在六平山下山有龍潭重泉飛注潭深不可測相傳有龍

居之明知縣夏允彝以秋旱宜禱山出雲夏旱宜禱龍興兩建寺

以祀龍神捐俸令山主諸生陳所守陳雲翼成之
夏允彝記聞諸上古山川有能

長樂縣志

卷之八

祠祀

望

寺觀

潤於百里者則祀之觸石而出膚寸而合不崇朝而徧雨乎天下者唯泰山爾其他蒸霧涌煙升雲而傾潤者未易更僕數也則以為山自為之耶其有為之者耶山不能自為而有待於為之者則龍之力居多或曰牛蹠之泔不能生鱸鮪尋丈之淵豈所以蓄神龍乎不知龍者藏形於無而遊心於漠若氣之無迹若水之無創故能滑淖騰躍貫金石窮致遠放乎九天之上蟠乎黃廬之下應令月之風律昭嘉祥之赫戲方其在山也無以異於其在川也方其在廣洋大澤也無以異於其在牛蹠之泔尋丈之淵也則謂天下之山無大無小莫不有神龍焉棲之亦奚不可雖然指天下之山而謂龍皆在焉與指龍所嘗出沒往來之山而謂龍無有焉龍不可致焉者皆蔽也邑治之北鬼然連亘者六平山相傳其上有龍潭歲早則有司率吏民禱於其址禱之虔則甘雨時澍年穀順成甚哉龍之為靈昭昭也陳少司馬嘗築菴於上今漸圮余捐俸合陳生所守雲翼更築靈泉觀祀龍神焉度此杯勺之泉豈足以潤此百里之封而謂之靈者繫之以龍也韓昌黎謂龍弗得雲無以神其靈而余以為泉弗得龍亦無以神其靈矣於是歲時率吏民相與祀龍神於觀中以祈甘雨時澍年穀順成云旁祠司馬報開山功也為迎神送神之詩使巫歌之其辭曰諏吉日兮選良辰穆將愉兮迎龍神持瓊芳兮布瑤席祠壇皎潔肅無塵揚枹拊鼓向寥廓雷輿風颺聲粼粼首章迎神龍神皇皇既降止天矯連蟠

撼蒼旻噓氣成雲滿山谷明棗薌合何紛綸博碩脂分竿瑟頻安
歌緩節娛靈神次章饗神神既歆兮樂既闋豐隆東駕整前旌光
景屬天雷雨作神靈仰偃云未醒史巫陳
詞洵紛若甘霖數澍奏豐亨三章送神
嗣廢

眾敬庵 在縣治東

白毫庵 在縣東水關門內

溪亭庵 在縣東水關門內今名成化閣

慈靜庵 在縣西塔山下

佑聖堂 在西隅庵頭橋北明宏治庚戌知縣潘府修扁曰一事堂

隆慶辛未知縣蔣以忠重建改扁皇華駐節嗣廢

福泉堂 在縣治西隅河南山上嗣廢

妙音堂 在縣太平橋北嗣廢

長樂縣志

卷之八

祠祀

四

寺觀

元真宮 在縣東隅六平山嗣廢

黃庭道院 在縣東

崇福寺 在二都嗣廢

延祥寺 在一都嗣廢

圓覺寺 在一都龍門後澳

興濟堂 在一都明成化年間建 國朝乾隆己卯重修

聚魁堂 在一都嗣廢

龍興堂 在一都輞上

元應宮 在一都翁山下宋嘉熙四年建

仙跡宮 在一都阜山石上有仙跡

淨林寺 在三都珠湖一名古谷寺溪澗清幽谷口有寺架橋通道

因以古谷名

明成化元年建 國朝同治五年里人陳廣書陳廣超倡修邑人陳樹霖春日遊古谷寺詩蕭寺何年名

古谷緣溪探訪穿林麓同人三五欣相隨路轉峯迴苔徑復飛泉千尺瀉遙岑翠洞陰陰懸蝙蝠我來小憩香積厨繞砌山花何郁郁清幽佳景足留人出岫無心雲相逐倦遊依舊過前川風送松聲聞謾謾

聽泉寺 在三都原名幽林寺後移舊址旁改今名

申屠寺 在三都基存

南崇信寺 在三都嗣廢

靈山塔寺 在三都嗣廢

青雲寺 在三都芳山中祀真武

長星觀 在三都岱邊明洪武初有道士號月公飛昇於此後廢天

長樂縣志

卷之八

祠祀

聖

寺觀

啓開邑人陳長祚捐貲募緣重建爲寺沿溪里許有石洞門里人卓爾書石室半閒雲五字又雲屏月峽四大字上有飛泉掛壁及仙人跡諸勝

淨林庵 在三都珠湖 國朝乾隆三十一年建同治六年陳崇惠

陳廣贊倡捐重修後展疊峯前襟雙橋西山一帶奇峯削劣若環

拱於階戶之前南枕溪灣清流縈繞林木葱鬱而村落之鱗比江

湖之去來一覽畢收洵此都勝境也中有十景曰松溪積翠曰短

橋流水曰半壑香泉曰漁舟獨泊曰山頭樵笛曰疏鐘遠韻曰梅

塢凝香曰遠浦歸帆曰雞聲茅店曰酒市漁燈

邑人陳樹霖各有題詠今摘錄二章

短橋流水云桃花潭水野橋高藜杖輕扶上九臯石罅涓涓流去冷出山便作海中濤半壑香泉云一泓澄澈傍深潭玉液流來味

自甘解盡相如無限
渴茗煙槐火月初三

觀音堂 在三都岱邊元至正二十五年建嗣圯 國朝雍正閒移

建斗南橋上改名松溪寺乾隆乙亥年里人重建為鄉約所

聚魁堂 在岱邊聚魁橋上今為文昌祠

佑聖道院 在三都龜山

秀峯寺 在四都今敏山同治元年里人陳德韜倡捐重修

新安寺 在四都嗣廢

靈掘寺 在四都嗣廢

中峯寺 在四都嗣廢

龍興庵 在四都明萬厯里人高拱宿募建

長樂縣志

卷之八

祠祀

吳

寺觀

乾元寺 在五都嗣廢

東庵寺 在五都嗣廢

南崇福寺 在五都嗣廢

保福寺 在五都乾隆二十四年寺僧勸捐修整

南棲林寺 在五都嗣廢

龍溪寺 在五都乾隆乙丑年建

雙澗堂 在五都元至正二十年建前有雙澗故名明萬厯戊午里

人林什等重建 國朝乾隆庚申里人林以傳等重修

崇真宮 在五都宋淳祐元年建明永樂三年重建

靈鷲寺 在六都嗣廢

西峯寺 在六都梁開平二年建元至正九年重修嗣廢今竹田村分西字名西興寺明天啓初建 國朝康熙辛丑重修西有文昌祠乾隆己卯建井門村分峯字寺名新峯太僕陳文沛孫士煒建煒失傳其外孫七都洋下貢生李春芳進煒等木主於寺捨田五畝零爲蒸嘗

雲谷寺 在六都郭溪橋上明天啓開官建西有文昌閣因朱文公

遊此篆書於門又有朱子閣 國朝順治乙未舉人林千里重修

林其衍捨寺西文昌祠田二畝庠生林弼虞捨寺田園共五畝

珠林寺 在六都

福星庵 在六都鳴鳳嶺明代建 國朝乾隆十三年廩生林中鳳

長樂縣志

卷之八

祠祀

聖

寺觀

重修

普化堂 在六都嗣廢

永壽尼院 在六都

當陽寺 在七都柏山上唐咸通六年建有二堂曰山月雷音邑人林慈

詩鳥道緣空碧龍宮入翠微逢師持鉢日恰我到山時蘿徑干林滿風泉百道飛何年至城邑惜別欲留衣邑人林誥詩何處遇幽景當陽絕頂尋雲霞千古態松竹四時陰岫列天邊障泉鳴澗底琴高人不遊此應負愛山心

靈源寺 在七都嗣廢

報先寺 在七都嗣廢

瑞峯寺 在七都嗣廢

南觀音寺 在七都嗣廢

阮山寺 在八都明洪武二十五年併入天王寺

南福興寺 在八都屏山南宋殿中丞潘仁杲建後廢 國朝康熙

乙卯年太學生陳則襄重建壬辰年重修 潘振武序別見

南甘泉寺 在八都甘泉山下基存

極樂寺 在八都嗣廢

小門寺 在八都康熙間重修改名蓮石寺

朝元觀 在八都紫陽閣畔宋進士張一漁建旁有歸愚洞後有九

仙洞

資壽寺 在九都宋太平興國閒建治平中修有芬蘭祖意二軒

靈隱寺 在九都明萬曆四十年僧如晃重建 國朝康熙二十六

長樂縣志

卷之八

祠祀

哭

寺觀

年里人陳端道光十三年里人林世鏘先後倡修

龍門庵 在九都桃坑

龍雲堂 在青橋鬍松嶺下 國朝康熙己丑年里人陳國鼎遷稍

東同治七年里人陳贊等重修

文殊尼院 在九都

大澤寺 在十都五代時賜田五百餘畝 租載田賦志

龍泉寺 在十都明萬曆閒里人知府陳玉運丞葉時敏重建又時

敏子有祿與住持僧隆珂同建有彌陀殿觀音堂 邑人高棟詩上方瓦礫委中庭

牧子歌殘不忍聽草暗牛眠崖石冷井寒龍去洞泉腥干花莫禮 空山塔半偈難尋大藏經猶有殘僧愁獨坐松房半掩五峯青

二弱齡會此禮天人三十年來嘆棘榛百丈圓光何處見五峯休 氣幾回新空傳寶地無窮劫誰道金剛不壞身獨向殘陽頻弔古

滄溟無岸也飛塵霽奕芳詩層崖曲磴隱孤妍到處微開色界天
座對金尊頻中聖廚分玉板共參禪風傳松柏千巖響雨洗藤蘿
一簞鮮日暮不須愁秉燭法堂應自有燈燃其二春山伐木聽鶯
鳴百尺龍沙擁化城嵐氣隔林還響鐘聲出谷更分明階薰暗
草禪房冷饌設新芽午供清見說 大座地石柱存乾隆二十七年
諸天多妙覺幾人到此學無生

里人李名健倡捐重建

知縣賀世駿記邑之十都有沙京四野平疇無附麗突起層巒衍為五峯透迤數里

靈秀之氣甲吳航故人文之萃大魁天下者宋有鄭文定明有李
修撰兩先生他如擢巍科膺顯宦者指不勝屈逮我 本朝衣冠
文物尤濟濟相望焉至於清淑所聚闡為宗風方外奇行亦時挺
出如大智百丈祖師卓錫於此關蕪開山而龍泉之寺以與其名
則唐咸通中所敕賜也五季天福間又有普明禪師更擴其基厥
後潘博士修之迄今蓋數百載矣春二月余以公事至其地澗古
松幽頓浣塵懷抵山門雲窩靜壑花木清香石柱屹然龍井澄澈
玉帶宛在米佛猶存攝衣高峯徘徊四望則見御笏東朝首石西
峙籌巖擁其北溟海環其南俯視萬山星羅碁布孤峯獨臥與聞
之湧泉福之黃檗可稱鼎足顧滄桑屢變梵宇就傾仰瞻法象不
無檀越之感茲鄉之好義者以此山為靈秀所聚而此寺又為古
佛所棲傷其日淪荒蕪爰集眾鳩金諏吉於九月四日越臘月告
祠祀

長樂縣志

卷之八

祠祀

巽

寺觀

成事焉天宮梵室燦耀輝煌一復向之龍蟠淨域象鎮精藍之舊
既落成鄉之人咸請余言誌其事予惟象教之在中國由來已久
雖虛無寂滅儒者所不道第靈秀之區非有蘭若靜室俾緇衣棲
止其閒或往往就於荒僻無以應山川之王氣茲山自開闢以來
有龍泉三興三大魁之識而鄭李而下未聞有繼其踵者安知此
舉不即符其兆乎余正樂觀其事以驗茲山之靈也故因其請援
筆而為之記 咸豐八年里人李德懋等重修

龜石泗洲寺 在十都久廢

興國寺 在十都久廢

龍岡寺 在十都宋乾道間建嗣圯同治七年里人鄭藻江鄭其圭

等募捐重建

龜石庵 在十都宋紹興元年建庵前有石如龜故名

萬壽庵 在十都唐乾符中邑人鄭攝等建舊有石臺高數仞今圯

慈華庵 在十都康熙間建

建林寺 在十一都青山下康熙庚午年耆民黃大覺重建旁有觀

音閣雍正四年覺孫兆祥兆禮建乾隆乙卯年覺曾孫邦模重修

道光壬午年里人黃明順等倡捐重修

福甯寺 在十一都

國興寺 在十一都

龍興寺 在十一都定山之麓宋僧智清建明萬曆二十六年里人

孝廉蔣奕芳重建

蔣奕芳詩琳宮瀟灑對禪談舊解楞嚴只兩函門外風簾原不動鏡中空水遠相涵法筵開處

龍來護香積分餘鳥共參何事把茅峯頂住人間隨地有瞿曇其二祇林寒雨動微涼暇日幽尋到上方僧舍乍飛青玉鉢佛堂初試紫茸香經聲靜處聞流水塔影斜時見夕陽坐起暮鐘歸去晚不知秋露滴衣裳 自寺南至龜石北至牛

長樂縣志

卷之八

祠祀

寺

寺觀

石俱寺地

雙峯寺 在十一都雁塘井南兩鄉同建

蓮花峯寺 在十一都福州裏

福安寺 在十一都後有福山董巖舊傳董奉生於此地煉丹上昇

采縣令閔希聲詩驂鶴凌空載舊經至今風月有餘清軒窗物外無塵到芝木香中作眼明沙鳥宛疑鳧為露蜂猶學玉簫聲高僧不厭庸人擾煮茗欣顏每見迎運使張徽詩日來惆悵步虛壇霜葉堆紅雨薛班幾卷道書傳物外一丸仙藥付人間星槎往往浮東海風馭時時上北山誰信舊遊人尚在白雲深處採芝還運使賈青詩當年遺事舊塵蹤遠水晴山一望中著雨煉壇苔皴綠經霜池檻葉飄紅步虛聲斷寒星暗採藥人歸夕炤空此去丹青知甚近吾家有路舊曾通運判蔣之奇詩便道行經董奉山晨餐聊為解征鞍青林幕幕嵐烟重白晝昏昏海氣寒縣合時來尋舊迹仙人去後有空壇一九曾遺交州藥應是當時煉就丹 廢

金沙尼院 在十一都

竹林寺 在十二都陳戶部郎中林勣捨宅為寺遂退居寺西安適

軒唐最詩臥聽潮音坐看山煙蘿靜處閉僧關都將物外紅塵隔
軒占得壺中白日閒吟罷寒猿號木末定回清磬落雲閒高僧隱
几無餘事應笑
勞生去又還

寶藏寺 在十二都後寺田併入竹林寺

法淵寺 在十二都邑人陳毅詩遠歸滄海通舟楫近洗山僧一
片心留與臥龍成窟穴等閒飛出也為霖 嗣

廢

光宅寺 在十二都嗣廢

普光寺 在十二都前與康熙初創內祀文昌帝君寺後田園三畝

零

長樂縣志

卷之八

祠祀

寺

寺觀

珠墩寺 在十二都明天啓元年里人陳長祚造七級浮屠並建寺

今塔猶存

九龍庵 在十二都明天啓元年邑人陳長祚建 國朝乾隆五十

九年陳化龍重修道光八年陳堯書重修

仙源庵 在十二都宋乾道元年建元至正二十二年重修

慈信庵 在十二都距竹林寺里許乾隆戊午重建

禪林尼院 在十二都今廢

棲林尼院 在十二都今廢

光嚴寺 在十三都陳大建中里人嚴光捨宅為寺宋元豐閒建照

山堂主簿陳之
邵記別見中有仁智軒光又捨田四百五十餘畝以充香燈

明成化閒寺僧佛清運糧失水鬻田賠償每歲徵佃戶之糧給僧
焚修納餉知縣萬編立石於儀門崇禎十二年知縣夏允彝清察
寺田諭各佃戶輸穀入官完餉祇給香燈付僧焚修官民便之

泗明寺 在十三都嗣廢

地藏寺 在十三都嗣廢

普照庵 在十三都

寶溪庵 在十三都元天曆元年建

山前庵 在十三都

廣順寺 在十四都嗣廢

雲龍寺 在十四都雲路康熙三十八年建乾隆五年里人陳懋蕃

長樂縣志

卷之八

祠祀

寺

寺觀

等重修

文京寺 在十四都華嶺下前後二座

龍角峯寺 在十四都犀村山宋嘉定閒建前後二座士多讀書其

閒旁有石洞 國朝雍正三年僧禪隱闢題其頂曰圓通巖又曰

洞天仰止為龍峯八景之一洞中塑有普陀巖觀音羅漢諸像後

圯乾隆二十四年重建復廣後座重建文昌閣於東畔構亭於寺

前

互見龍角峯

陳子敬捨田三畝三分零土名虎頭山陳觀捨田園共

二畝四分土名草安裡

北觀音寺 在十四都康熙閒洞湖村林姓重建乾隆四年生員林

國樑等重修

董塘觀 在十四都董塘嶺今只有觀音亭見古蹟

寶林庵 在十四都宋雍熙二年建 國朝康熙五十四年里人林

天柱重建互見泰山廟

仁壽庵 在十四都元至正二年建

淨土庵 在十四都明萬曆四十年宗靈庄陳氏祖淨捨財鼎建三

座招徒法林募緣增修 國朝康熙五十八年里人王世兆等重

修道光二十年咸豐九年里人王尚訓王守沂等先後重修

麟應堂 在十四都宋紹興二十八年建 國朝乾隆二十一年重

修三座四圍舊基尚未盡建

泗州佛堂 在十四都雲路村道光二十六年里人重修

長樂縣志

卷之八

祠祀

寺

寺觀

龍宮寺 在十五都唐乾符三年里人募緣建明洪武閒併入皇恩

寺采縣令袁正規詩水晶樓殿碧涵空妙絕人間不到功說與塵中應詫我昨宵平地到龍宮其二尋春攜侶訪禪翁十里清陰

鑠碧空笑問山童路何適海濤高處是龍宮

普光禪寺 在十五都錦橋西頭乾隆二十五年錦江一圖里人公

建原普光堂今改寺

文明堂 在十五都舊名大明後改今名

普光堂 在十五都

顯應宮 在十五都宋紹興八年建

真元寺 在十六都藍田宋至和元年建祀佑聖真君 國朝乾隆

己未年重建原名真元觀

報恩寺 在十六都久廢

華藏寺 在十六都原名瑞應庵康熙閒重建改今名乾隆二十五年復廣舊基重建

華文寺 在十六都二圖鄉約所舊名佑聖堂雍正癸丑里諸生陳

冠南等重建改今名東有文昌閣乾隆癸巳監生吳寬等重建前座寺後有路達雲路橋里民吳天良吳天振捐鋪

瑞應庵 在十六都宋紹興四年建今移對溪改名華藏寺

孔聖堂 在十六都藍田鄉約所旁

五雲寺 在十七都邑人王恭詩詩酒蘭亭會何如共遠公行看五雲裏絕似虎溪中清梵花臺兩名香竹徑風未

須論被禊自 嗣廢基存

長樂縣志

卷之八

祠祀

五

寺觀

仁麟寺 在十七都鵬程地方陳謝二姓共建舊名醫靈行宮

萬壽寺 在十七都一名五雲庵後有帝君閣前有亭康熙初里人新建

鴻慶寺 在十七都因調遷燬康熙辛未池姓重建

鳳儀庵 在十七都康熙戊子里人建

萬壽庵 在十七都仙山以祝聖而建道場故名施林李等姓捨田六十畝以供焚修今庵廢舊基尚存

正覺堂 在十七都基存

報恩堂 在十七都元至正五年建

醫靈行宮 在十七都鵬程村互見仁靈寺

萬壽道院 在十七都今廢

新成寺 在十八都唐大中十四年建明成化中併入天王寺

鼎山寺 在十八都壺井康熙間建

靈光寺 在十八都嗣廢

靈峯寺 在十九都靈峯山唐大中七年建初名龍龕寺八年賜額

靈峯寺後燬 國朝康熙間僧古鏡重建後座雍正間重建前座

詳靈峯山同治八年里人陳允恭陳穆孚倡修邑侯彭光藻記靈峯山

曰龍龕山山有靈峯禪寺創始於唐如卓大師大中八年御賜題

顏明季燬於火 國初古鏡上人修復嘉慶間里人陳諸秋倡修

迄今六十年所日即荒頽紳士陳允恭穆孚等偕里人釀貲更修

長廊曲榭頗增舊觀南樓三楹可資學士下帷書聲禪誦風景彌

佳越七月工竣來請余為記余惟山故瑰奇靈秀所鍾毓者必有

偉人傑士琳宮梵刹特被飾乎巖壑者耳諸君既雅意於是知必

有不負乎山之瑰奇靈秀而非徒為是被飾者宋陳述占明高廷

禮登此山皆有題詠而明末梁隱士雲龕山人結茅其下杜門不

出今天下承平久矣度無隱者遺佚巖壑來遊覽者豈遂無陳高

其人乎志稱山有十二奇而望海亭香鑪峯歸雲洞天池山尤勝

余簿書鞅掌有暇尚欲一攬擷諸勝歸憩禪寺以清滌塵勞述古

詩云憑闌望鄉樹千里楚江皋陳非楚人何有此語是殆豫為余

詠試問山靈相視一笑也至是役集貲

姓名募費款日各具別石不復綴云

長樂縣志

卷之八

祠祀

寺觀

寺觀

大溪新豐寺

在十九都今廢

里人隱者陳天英有詩勒石

泗洲堂

在十九都古樓前唐開元中建宋紹興中重建基存

潮印塔寺

在二十都松下澳明萬曆三十九年里人知府林繼衡

同緣首林桓董其事借本生息造浮屠七級於海中磐石之上

鄭伯辰詩面面玲瓏出海濱真龍頭角此崢嶸乾坤自古東南缺

形勝於今補鍊成萬丈光芒浮舍利一天星斗煥文明譽髦喜際

風雲會雁柱 天啓閒里人鄭建箴募緣建寺名潮印今祀為檀越

鹿山寺 在二十都山前村

興龍寺 在二十都隴下鶴石巖前

清化堂 在二十都松下

九使宮 在二十都潮印寺後與黃檗山隔江相對明正德三年建

萬厯閒里人陳春霆倡修

鳳井庵 在二十一都前後五座崇祀 紫陽朱夫子殿前有古井

一十餘軻故老相傳有鳳鳥浴其中同治四年里人林濤募緣重修

巖泉報恩寺 在二十一都唐天復二年建中有照寂軒宏源洞嗣

廢今寺田為學田

長樂縣志

卷之八

祠祀

五

寺觀

靈山寺 在二十一都唐咸通九年建十年賜額明永樂十五年重

修嗣廢併入古靈山寺

資福寺 在二十一都嗣廢

北崇福寺 在二十一都嗣廢

越峯寺 在二十一都嗣廢

古靈山寺即古山庄康熙三十五年邑人參政高龍光重建寺後石

碑書天澤泉三字乾隆十八年寺僧法音左畔建靜室二間

西石巖寺 在二十一都

常峯寺 在二十一都太常山乾隆辛亥重建

祥雲寺 在方安里唐光化二年建以寺旁潭中有龍因名其寺曰

龍澍宋治平初避上諱改曰祥雲

雙峯寺 在方安里鼇峯之陽基存

妙峯寺 在方安里嗣廢

將軍巖寺 在方安里岱西咸豐四年里人柯壽亭倡修

尚書庵 見達泉書院

榮菊庵 在方安里潭頭村

鳳山堂 在方安里

相巖堂 在方安里二劉康熙閒里人劉相巖捐田為堂因名

龍華道院 在方安里今廢

崇信寺 在大宏里宋建隆二年建 邑人林恕詩巢雲方丈鏤潺湲流水柴門鎖日關萬里嵐煙秋

長樂縣志

卷之八

祠祀

五

寺觀

雨後一庭草色夕陽閒香殘石鼎僧初定簾捲巖扉鶴正還百尺高樓天外景倚欄邀月獨看山

國朝康熙閒

重建

龍山寺 在大宏里康熙閒文石八社人同建乾隆九年修道光二

十四年里人鄭明如募眾重修

勝田寺 在大宏里康熙庚子年建

大士庵 在大宏里康熙甲戌年建

東林庵 在大宏里文石明嘉靖十三年重修三十四年知縣詹萊

扁其亭曰初雨亭嗣廢基存

湧泉庵 在大宏里雁峯之麓其地有泉湧出故名

皇恩寺 在二十三都梁太清元年建唐咸通九年賜額 至簿陳之邵詩老檜

喬松路屈盤翬飛金碧照巖端僧尋翠巘曾揮錫客厭紅塵屢解鞍望斷四天春野濶夢回一枕夜濤寒陽休况是多佳句吟罷碧雲時倚闌陳毅詩樓殿參差倚白雲菩提枝老掛金新門開海國多留月地接梅林早見春巖溜暗滋封薛竹砌風長掃隔窗塵禪僧喜客非趨俗平日能來有幾人 國朝同治七年知縣王仲汶捐修

靈瑞寺 在二十三都嗣廢

調元堂 在二十三都元皇慶二年建明永樂六年重修嗣改為梅

花駐節亭 國朝道光六年重修中建步青閣祀文昌帝君

思德堂 在二十三都舊名龍珠堂明隆慶辛未知縣蔣以忠重修

祀林倉曹鷗改今名知縣劉士達扁曰崇德報功

明教堂 在二十三都宋元祐二年建里人狀元陳文龍暨林得中

林亞文姚同姚逢午陳覺伯咸讀書其中今基存

長樂縣志 卷之八

祠祀

五

寺觀

龍濟堂 在二十三都嗣廢

碁山寺 在二十四都唐咸通二年建 明邑人陳亮詩久耽邱壑遊未歷碁山路偶訪招提居負

緣入祇樹雲林更左轉始得禪樓處落日寒蟬鳴藹然松杉暮眞僧喜相接况有平生故秘篋散香芸各卮酌甘露嘗懷學空理暫喜捐塵慮永願依道林慚非許元度 國朝康熙間燬嗣建後座雍正間又建前座

餘基尚未盡復

斗湖寺 在二十四都

殊勝堂 在二十四都嗣廢

寶光堂 在二十四都

湖山堂 在二十四都元泰定二年建 國初建乾隆二十七年里

人重修

觀音堂 在二十四都梅花澳

水仙宮 在二十四都梅花城內

塔附

南山塔 在縣治西南宋建炎開寺僧造 互見三峯塔寺

朱墩塔 在十二都明天啓開里人尚書陳長祚造

祝聖塔 在十九都江田泗洲佛橋前

潮印塔 在二十都松下明萬曆開里人知府林繼衡造

文石三塔 一在澳東龍山 一在澳西獅山 一在澳北馬山上

造未成祇有基名上元塔

墳墓 舊志多略且葬在外邑者俱不錄今查明補人

長樂縣志 卷之八 祠祀

堯 塔

唐林水部慎思墓 在十四都杜橋大墓山乾隆二 鄭宣議郎攝墓在

湖山宋趙丞相汝愚墓 在縣治左隔一溪僅半里許按夏志云宋史 汝愚永州安置道經衡州暴卒今郡庠鄉賢

祠有趙汝騰官尚書疑此墓為汝騰墓今考趙氏世譜慶元甲寅年 公卒至嘉泰壬戌年詔其子扶棺葬於原貶之地隨詔福州觀察使

陳孔法依禮督令官屬監督完葬戊辰年興工至嘉定庚 贈光祿大

夫陳圖墓 在五都洋門趙丞相以夫墓 在縣東十步許明正統中為 盜所發有司飭治按夏志云

舊志趙瑱闖三山人理宗時為丞相後奉夫人金氏居長樂 陳營田

侍郎愈墓 在石門高麗王祖墓 在逍遙里資壽寺後列充山高麗王 將行忽有星墜於庭是夕宜星生因以為名宜星有奇質父吏部侍

既卒高麗王入貢宜星從歸王器其才後王無子因以為嗣 吏部侍

郎陸藻墓 在籌峯溪上崇信寺西 太常博士陸震墓 在西隅金斗 鄭

朝散邦直墓 在勒馬山陳先儒宋霖墓 在閩邑至德劉知縣嘉猷墓 在方 安里

二劉上 宛山 劉先儒砥墓 在本里金雞山改葬 劉先儒礪墓 在連江縣寶林寺山 陳

先儒烈墓 在五都 陳森墓 在較場丁厝壑獅公寺後碑久無存道光

此石者煩為修築咸豐八年裔孫鴻瀨重修 陳先儒剛翁墓 在二

門三 陳評事晉墓 在石門 劉先儒子玠墓 在方安里祥 陳開國伯萬

春墓 在十四都仙人峯考萬春墓實在十一都福泉山神道石 鄭樞

密性之墓 在八都阮山翁 鄭助教申之墓 在龍魁山乾隆辛巳 黃御

史瑀墓 在侯官長箕嶺朱子為撰墓志子文肅公幹墓亦在焉 趙尚

書忠清汝騰墓 在縣左隔溪祭酒里 陳侍郎垓墓 在青山 王提刑益

祥墓 在縣北 張提刑肱墓 在十一都福山下 陳先儒枏墓 在福清

對面峯 張提刑狝墓 在十一都廉風里所居屋 林進士伯介墓 在十

長樂縣志 卷之八 祠祀 墳墓

羅仙 林睢陽合植墓 在十一都雁 林司戶德載墓 在十一都 陳司理

鏊墓 在十一都 張尚書鎮墓 在十一都 陳朝散大夫容墓 在縣北半

之陳先儒合墓 有三一在三都埔頭山一在芳 李中丞望墓 在五都

高樞密應松墓 在五都 陳忠通王伯嘉墓 在縣西天 卓少卿爾墓 在

都麒麟 馬知縣玉簡墓 在三都 宋宗室親王趙若英墓 在十九 姚刺史

宗虞墓 在鶴石 陳教授如晦墓 在新開東 林安撫安上墓 在十一都

陳勤王忠義知縣公榮墓 在十九都靈峯山 陳提刑簡法宗傳墓 在

都潘 元歐陽先生侑墓 在十四都平安山碑 陳義姑之墓 在十三都

黃朝奉郎祺墓 在四都 明陳知縣仲進墓 在十九都鳳凰山又浙江

衣冠之 高典籍棟墓 在二都 陳提領天惠墓 在十九都 陳贊善仲完

藏也 牛占山

墓 在十九都 陳榜眼全墓 在十九都 鄭參議序墓 在本里 鄭給事枚

墓 在蝦崙山 黃知府景隆墓 在福省西郭外 黃忠烈大守銅墓 在青山

山 馬狀元鐸墓 在大安里 吳僉事實墓 在二都 李狀元騏墓 在十都

窟 王參議有恬墓 在六安里 黃吏部郎中熙墓 在青山下 陳中書舍

人登墓 在十九都 謝都御史士元墓 在省南雞籠 李主事森墓 在十

山 鄭醴陵合墓 在福湖 鄭提學崇墓 在青藍 林尚書廷選墓 在妙峯

營 贈監察御史陳時學墓 在十三都 陳御史文試墓 在東門 鄭布政錫

文墓 在縣西北 謝觀察廷柱墓 在二十都 謝太守廷瑞墓 在閩縣仁

山 鄭寺丞憲墓 在鼓山 林忠諫公黼墓 在大馬山 陳布政崇德墓 在

九都大 陳太僕卿文沛墓 在本里 陳侍郎省墓 在四都 鄭侍郎世威

溪山 長樂縣志 卷之八 祠祀 壙墓

墓 在麒麟山 鄭知府錫麟墓 在北關外 陳知縣日光墓 在方安里 林

貞女墓 在嶺 陳御史豪墓 在省北門外 陳知府玉墓 在十都石 陳布

政時範墓 在欽仁里 謝長史汝韶墓 在蓮花 鄭吏部功甫墓 在閩縣

陳御史聯芳墓 在馬坑山 林郎中世章墓 在欽仁里 謝尚書杰墓 在光俗

山有司營葬府 謝方伯肇瀚墓 在閩縣高陽 劉刑部主事沂春墓 在

安里孔 劉知府大亨墓 在二十一 林知州家徵墓 在二十一 葉同知

時敏墓 在十都葉崎 蔣郎中行義墓 在十都 蔡夫人墓 在梅花馬

坑相傳葬時風雷大作次日失其所在但見 國朝陳御史書墓 在

土邱環水而已俗號田螺穴云互見里祀 游守備崇功墓 在九都利充裏

縣光俗里 高參政龍光墓 在二十一 贈文林郎陳榕川墓 在青橋 贈通奉

賜祭 劉參將禧墓 在侯官縣鳳 贈文林郎陳榕川墓 在青橋 贈通奉

大夫黃邦柱墓在九都環塘山梁太常上國墓在府城西郭梁中丞

章鉅墓在侯官西關贈中憲大夫陳璘墓在五都南贈中憲大夫陳

三吉墓在石門陳觀察學穎墓在五都西贈通奉大夫陳萬春墓在

橋官廳山子澗嶺兜山黃教授觀書墓在青山下贈通奉大夫黃一桂墓在

霧樹雲衲葬在青山下贈資政大夫

山下黃賜四品祭葬大庾縣知縣黃榮庚墓在青山下贈奉政大夫陳學

恪山鄭同知榕墓在省北門陳訓導朝模墓在石門鴨贈奉政大夫陳學

猷墓在阮贈文林郎蔣子周墓在九都贈文林郎蔣文鵬墓在東隅

巖高在青贈武翼都尉陳道昭墓在二十一封通奉大夫陳際治墓在青

占鄭知縣廷珪墓在岱邊鄭鹽運使司元璧墓在省北門陳知縣棟

登墓在十三都長樂縣志 卷之八 祠祀 墳墓

補遺 賀公祠 在七都感恩村乾隆間邑侯世駿修築南陂六鄉水利

賴居民德之立祠以報每歲六月間致祭 一在巔頭龍興寺旁

